

聽

雨

樓

隨

筆

聽雨樓隨筆卷四

李石農方伯鑾宣山西靜樂人家

陞雲南臬使緣事謫戍塞外復由部郎起至廣東按察嘉慶丙子陞四川布政旋陞滇撫未行遽卒蔣礪堂先生移節來蜀以舊日寅好恐其詩稿散失爲作序刻之所著詩千二百首公與法時帆洪稚存諸詞人以詩往還暇輒吟咏自適故作詩獨多有成都雜咏十二首錄其六云四面奇峰擁畫屏迢迢劍外蜀天青人行鳥背穿龍穴江繞魚腸鑿鼈靈石紐曾聞畱禹迹版圖先見入堯廷華陽黑水

梁州域漫詔開山自五丁拔山有力怨重瞳棧閣燒殘土
復東逐鹿中原嗟板蕩斬蛇高帝是英雄鼎留後世三分
業幟樹當年百戰功玉壘浮雲變今古渝歌猶唱大王風
蠶叢自古號巖疆了了青衣割據場往日公孫曾躍馬何
年豎子又牽羊圖懸八陣雲蒼莽夢憶三刀路阻長金鴈
不飛孤鶴杳少城城角挂斜陽三郎當日太郎當棧雨淋
鈴枉斷腸爲避烽煙來蜀道豈知鼙鼓動漁陽猪龍跋扈
窺中夏鸚鵡聰明問上皇聽說聲聲奈何帝那堪重唱荔
枝香腰鎌影裡熟林檎獵獵西風續斷砧羽扇罷揮名士
手魚箋巧寫美人心拒霜花映江波冷燈樹陰移暮靄沈

莫向張儀樓上望老年腰脚怕登臨竹外樓臺水外天摩
訶池上月華圓花明十里江如錦閣做三清地湧蓮魂魄
難招前望帝畫圖省識舊張仙男兒一个真何有賸得宮
詞萬口傳荷戈集五古真摯悲涼最佳多不具錄七律瑰
奇錄三首以存其概古城驛云排空埤堥塞垣長日薄崦
嵫憶故鄉一片牛羊衰草白萬峰冰雪暮雲黃春流如帶
環孤戍斥堠無烟冷戰場莫道天山落吾手異時東望更
蒼茫甘州云月氏遺壤古甘州井竈千家入望稠天外白
山如玉立天山亦名白山馬前黑水抱城流蒼涼亭障沉邊色寂
寞樓臺迥暮愁過眼烟雲堪一瞬不須重憶舊林邱五涼

偶詠云女牆低處迴蒼烟立馬平蕪意惘然葱嶺東來沙
是海玉門西去雪遮天蔓纏古壁留秦篆水漩寒渦出漢
錢莫到受降城上望白龍堆在塞門前

前任永寧道陳笠颿先生預亦號立帆乾隆丁未進士順
天宛平籍少時家運坎坷奔走南北及兄弟掇科第名人
多有詩贈答慰問悲之亦幸之也政事文章俱素所裕歷
升山東巡撫觀風齊魯制藝之外詩賦策問俱刊以式士
濟南濼源書院素稱才藪先生官課之餘不時考試不盡
以時藝也佳者賜以書籍筆墨荀亦逐隊其閒每蒙賞拔
招入院中親自發落殷殷致詢待諸生如家人內陞侍郎

以去荀署與文爲先生舊治風徽既邈山河如故感慨係之矣

川東道嵩與九先生齡善書著有筆記人稱簡古先娶長中堂女繼娶鐵制府冶亭保之女二公先後官山東巡撫鐵制府以書名詩亦專門家學漸染與九先生夫人亦精翰墨先生遊濟南居甥館明湖趵突之勝屐齒所經言之厯厯冶亭制府官山東時在辛酉壬戌閒門下士九省主考七省學院一時稱盛山東學使劉金門夫子亦制府門生也師弟同遊明湖共成一聯云四面荷花三面柳一城山色半城湖不可移置他處制府書之刻石以誌與九先

生觀察東川荀兩爲屬吏子慧成號裕庭丙申進士總督
南河先生今告退矣

山東濮州張人龍乾隆丙午舉人字雲門號若泉嘉慶六
年調成都附郭繁難稟明各上憲惟要務須裁酌者請見
一切浮套求寬免早起處置諸事畢騎馬周視閭里相度
地勢開山築堰興除利弊公正廉明每生辰祝者雲集禮
物俱不收不得已間受柴米丁艱居芙蓉書院貧無貲遠
近送米委之而去積至千餘石歷時旣久問他令姓名或
不知問張令無不知者縣有老人自號耕雲叟追懷其德
政題詩于威鳳山下店壁云昔年弊政已全刪膏澤隨車

酒市闌燕去燕來公府靜
花開花落訟庭閒
雨餘但有人
耕野夜暗何曾犬吠關
今日飛鳧東望杳何時
化履蜀中
還其感人深矣
送林西厓方伯還都門
詩才華富有詩云
記得庭梧一葉秋
十行丹詔下西郵
乞閒寧爲烟雲癖
多病應思杖履游
計日家園通曉夢
經時棠蔭繫離愁
殷殷肯謝蒼生望
無奈戎機漸白頭
四十年來治譜成
黃童白叟盡知名
武侯智略歸籌筆
蕭相功勛紀餉兵
正喜開藩全蜀宇
那期陳表上
神京卽今南浦牽裳日
江草江花亦有情
錦帆采鷁列江濱
雲物清和氣象新
香篆萬家填紫陌
冠裳一帶照青蘋
感恩多是蒙恩客
送別同爲惜別

人卻幸岷源春未漲輕舟欲發又逡巡自信材疎潤櫟榕
龍門一入慶遭逢嶺蟠土壤山名嶽派納潢渠海是宗直
許登堂無早暮每因侍坐獲陶鎔光風霽月銘心久搔首
臨歧失景從鞭絲飄蕩頻催馬猶及相依古渡閒日暮野
烟圍畫舫江昏紅燭照蒼顏浣衣早去風塵色贈語猶含
冰槩閑剪燭蓬窗頻見跋柝聲絡絡起空山滔滔漸看大
江來從此鳴榔喚纜開烟雨峩肩天上望鶯花錦里夢中
猜拂堤柳絮飛還止傍渚沙鷗去復迴都與深情相觸會
懷人憶事入詩裁福星到處卜平安地遠天遙未覺難來
岸旌旗迎畫檣中流鉦鼓下危灘荆門東去猿聲盡巫來

西連鳥道寬此後殷情傳尺素雲山肯信路漫漫
雲在眼前舊廬風雨足高眠庭餘蘭玉承家構德溢交親
散俸錢丹藥好調方外祕茗香恰得靜中便只疑妙入金
甌選又促鳴騶拜九天

雷際泰乾隆庚寅舉人任廣東高明縣有廉明之稱過洞
庭舟輕不勝風帆以沙實艙有詩云解纜從今悟昨非三
陽車馬任輕肥清風送盡波濤險饒得白沙滿載歸高明
舉人莫若之和云陽和澤沛幾年花滿玉山豈偶然三
十六都沾德化風清兩岸送歸船

渠縣人

李箐字漪園號可亭中江人聰穎過人工古今體詩戴羨

門制府深器之中嘉慶丁卯鄉試官南充教諭著有新竹山房小草荒政詩尤有關繫雖有冗句固不必以工拙論也勸捐云請富戶邑宰書名尉爲主紛紛懸帖下鄉村昨日無名今日補公堂開富者來富者半不來閉門高築黃金臺官符急如箭明日重開宴畢竟錢有神胥吏爲除名其餘勉強趨公庭按冊查名心各驚鄉愚不知官長貴一升一斗當面爭彼富者穀是饘是粥柴薪之費夫役資令以清俸補不足吾聞天之道虧盈帝之德好生救災恤鄰仁者之心如毛斯拔吝勿與不知九原何處用黃金粥廠云設粥賑貧民男厥西門女東門一家同至中路分婦人

攜子翁抱孫門外領籤如考試門內點人查姓字昨日人少今日多近者先來遠後至兩廠開聲如雷盛以瓦缶掬以指計口一盂各歡喜續命兮滄海粟陳照影兮滄浪水清延殘喘於將絕兮嗟爾民人庖人走報粥完矣眾議調停繼以米米如金勿浪與橫陳幾處饑民死治其事者邑紳衿析薪數米如婦人指揮羣丐多意氣提防夫役誠苦辛懸牌限辰已過午山門閉可憐後至防風氏含悲忍餓空歸去施米云開濟倉欲發不發難猜詳里保沿門查戶口紳士挾簿升公堂公堂日三四戶口冊不至自春及夏五閱月過盡凶年議不決荒政聚民濟倉以名胡爲利藪

視胥吏乃與紳士爭胥吏不敢爭阻抑使不行聚米爲山
朽蠹生積骸遍野餓殍盈一朝牌示期定矣先發城中後
鄉里極貧仍不分計口授糧一升米人浮於米胡不知索
米不得疑其私况兼里正入私橐侏儒自飽朔自饑弊生
於利明允乃濟轡策不施奸黠吏我民安矣賢侯去減價
云糶常平常平價減市價增應減而反增常平之米不濟
貧奸民日領三百斛須臾粗糲成精鑿公物居然奇貨居
獲三倍利一斗粟攜籤濟濟相摩肩籤多兮得米偏借問
何由然上下其手吏作奸或升或斗官爲限別有調停君
不見已恣吞噬入私囊更假贏餘作情面貧民持數錢瑟

縮不敢前徘徊至日暮爲報倉場米已完明朝來更早費
盡經營錢較少六千糶盡官倉粟烏雀長饑虎狼飽人心
險陂禍之胎戾氣感召天爲災溺不能援反下石弱肉強
食眞可哀官之仁政吏之福狐兔縱橫肆其毒君不見秋
風陰雨古牆深夜夜煩寃新鬼哭

民懼鞭笞避牆下
牆北壓斃數人

四川總制蔣礪堂先生攸銛幼有神童之目凡屬買一見
後卽識之無誤愛才士錦江書院知名士無不賞拔每秋
闈考簾官必同作詩文闈中題必有擬作後督兩江因事
內召卒于山東荏平

原任兩江總督琦侯前撫山東時臨清陽穀一帶大水荀

兩次謁見侯博採輿論剖決利弊命爲議以進有聊城友
前河督靳文襄公後人於本省水道考究最悉素聞其論
乃爲議獻之深蒙嘉獎侯明察強記胥吏作弊無不立燭
其奸責革不貸任直督凡山東所賞拔士迂道往謁無不
加意欵接以山東故孝廉謝某時文清真取以課子卽代
爲刻稿亦盛德事第於侯爲末節耳道光九年總督四川
荀來川侯去已久今爲坐藏大臣

地之名勝古蹟每藉文人筆墨鄭石幢方城宰新繁觸境
成詩有繁城雜咏錄其八首故城何處水西灣訪古徒令
寂寞還亭長至今無尺土舉頭誰是漢時關

繁城縣東北
漢置高帝封

張瞻師爲繁侯卽此菜花雨後竹雞啼四望平蕪落日低古木翠凋

祠亦圯春烟忍便付寒梨舊祀唐李德裕宋王益榘孽於縣署之東有一楸四相久廢今

復誰歟覆土作荒墳道是愁人獨仗君地下可尋劉阮問

死時那與醉時分杜康墓縣西幾堆亂石勢噴帆爭說飛來語

太謾敢是媧皇補天漏麗材棄擲總奇觀飛來石清江北岸墓水

橋邊慕有情誰令雙耳頓時清笑渠善謔公私語猶勝誇

張鼓吹聲墓水橋縣南宋邑令蘇寶放墓處洧水西頭望大江江流清白

透船窗當時琴鶴焚香吏太息千年未得雙清白江縣北卽洧水趙抃

經此日吾志如此清白故名如方興農事畝東南滿望滿渠碧似潭更欲

春疇滋萬頃瑞蓮重見水光涵東湖在縣治後唐李衛公開宋王益作令時生瑞蓮

梅摯有詩
記之今淤

三冬霑足卜來秋六出花飛看不休喜雨亭邊

多快事何如老子上南樓

望雪樓縣北今廢

宋名立山東蘭山人貢生喜爲詩五古清蒼不落凡近乾隆年閒知達州小尖山云茲山何峯嶽眞宰費雕鐫巖巖起峻削磴道轉連綿羣峰勢若拱疊嶂環其前迢迢分郡國晶晶帶通川仰挹浮雲翔俯視飛鳥還深林空泱泱嘉卉復葱芊哀猿啼薄暮山魑弄寒烟清風奪纒夏火雲布窮天陰陽多變換時序爲推遷獨與賞心遇頻使塵慮蠲念茲清曠境時有松喬仙翠屏山云迢遞郡城南參差列屏障疊石表奇形羣峰含異狀谿谷渺不測巖巒轉相向

刊除囑鬼工鑿削疑天匠雲掩荒亭迴雪捲空江
鬱嵯峨綺陌互條暢茂樹旣盤紆晴嵐忽蕩颺異獸
羣佳禽時引吭景物共澄鮮心目俱清曠言采三芝
須九節杖登眺躡丹梯置身青雲上

鄮石幢子天錦亦能詩送友人南旋次韻莫聽巴童唱竹
枝竹枝聽罷鬢成絲八年萬里三生話盡在西風泣別時
片帆東下水雲悠巫峽巴江景劇愁復有猿聲淒似笛五
更吹月送歸舟

王衍慶山東聊城舉人任渠縣調成都性剛介有爲所至
政聲翕然逆匪之亂兵民婦女被難者甚眾爲文祭之有

云慷慨赴敵偏教命掩重泉勇往直前竟爾魂歸長夜節
婦不甘受辱寧化青磷烈女各守其貞甘蹈白刃骸骨暴
於荒野見者傷心芳魂滯於幽冥聞者隕涕亦可當慷慨
悲歌矣

曹九成號易菴成都諸生性耿介家貧以詩酒自娛與陳
卯生趙玉山友善皆一時名士醃白菜云居然清白與人
同着點鹽梅別有功健飯將軍誇正好素餐學士刺常通
可知淡泊皆佳品莫把酸醎置下風昨夜大烹還憶汝宮
商盈齒嚼來工凍豆腐云腐尚難堪凍柰何瑩然早被雪
霜磨自他有耀還生甲泣釜何心更起窩已分糜身調鼎

去敢辭微骨受寒多
閨中欲奏廚刀績
却下晶簾待素娥
越王樓懷古云
瀟灑西風驛路悠
亂山黃葉下綿州
平沙
尙見飛雲石傑閣
誰開舊邸樓
簫管人隨殘劫換
芙蓉春
滿大江流憑高漫有興亡感
落日蒼茫古渡頭
此詩魄力
沉雄集中變調亦集中
壓卷其餘佳句云
天涯易感惟佳
節客裏難逢是酒人
神仙也愛遊塵世
我輩何須定廟廊
可以想其胸襟

民事惟農爲重
今雖不授田而牧令要當畱心於此
浙江
上虞張梧岡鳳翥最擅風雅
任彭山令勸農詩四首云
游
絲飛轡引康衢
春日郊原土脈疏
百里陰膏開沃野
一壺

寶鏡漾新畝浮沉翠麥和烟秀鱗櫛紅苜帶雨鋤

四川春麥多紅

待得田塍青似繡枝頭布穀叫村墟眼前風景促人忙雨
笠烟蓑遠近鄉荳麥齊腰年半稔柳榆拂面日初長鷄豚
茅徑村廬靜饒餉桑田野味香勸課不須勞長吏農歌三
兩韻悠揚平疇百頃漲新流極望光生剡剡浮秧母分畦
呈綺陌鵝兒點水立芳洲春旗露溼花閒犬嫩羽晴薰樹
上鳩攜得壺漿勸田畯好乘膏雨問青疇水鏡山簾四望
清一篙新漲綠盈盈溪流斷岸春浪亂雲擁遙岡碧樹橫
閒看桔槔高下影快聽牧笛往來聲太平時節安耕鑿頗
見田翁鼓腹行梧岡乾隆戊辰進士繼其任者爲史欽義

浙江餘姚副榜號醇菴亦有勸農詩四首鄉村引轡馳陽
天萬頃秧疇翠浪鮮此憤人忙紅杏雨沿堤鳩喚綠楊烟
循行祇念耕耘切勉作休教耒耜懸佇望桑麻盈井里還
將景物入吟箋社鼓頻敲西復東田歌聲徹綠雲中壺樽
澤徧桑田酒饒餉香傳麥浪風勸課何容勞長吏雨晴無
復卮元功爲呼田畷多齊力轉盼秋成慰 聖衷半犁新
水漲春泥雨笠烟蓑處處齊荊徑閒眠桑下犬芳塍時聽
稻中鷄牧童橫笛斜陽外秧母分畦曲湖西土脈香生蔬
潤候一聲布穀柳絲低豈是閒遊覽物華爲來田舍問桑
麻青疇綠樹含雲液甘雨和風簇稻花千耦其耘鳩拂羽

三時不害粟盈車待他黍稷豐穰日擊壤田頭聽萬家蓋有意與前人角勝也

張耐舫顧鑑行十三船山之父也與黎雅守備溫江王甯甫善耐舫官山東定陶令歷漢陽同知陞雲南知府以同知任內事被吏議性脫略揮金不惜人所有取而用之不計已所有人用之亦不計也歸裝囊無一錢冬日至無禦寒衣惟課二子誦讀人問無產業何以爲生指亥白船山曰此吾產業也善書求者踵門及病廢悉命船山代筆甯甫時時周之家藏耐舫贈詩一紙亦船山代書子女皆教以詩孫女出嫁後過其戚家僕挾一篋甯甫之孫侃與客

共坐令開視雲箋滿中皆姊妹姑嫂臨嫁時贈詩也一門
風雅如此

樂至有靈官井水清甘可療時疫相傳康熙初宵深月冷
青烟如幕卽有美女步虛翹立乍笑乍唬須臾百態又白
鷺時自井飛出咸疑其異以轆轤下汲緹健者探之寂無
聲響力引始上僵直如寐蘇乃言方及底見金甲赤鬚若
靈官者執鞭怒訶遂迷因神而名焉又有金瓢井距縣報
國寺里許丈餘深廣三尺不知何代鑿也水甘冽酷陽蒸
沸探之冰寒常平井口眾汲而不減每有金瓢浮出欲取
卽沉道光辛卯夏有銅梁販竹者偶獲之歸一家暴病棄

諸池其婦復病嚙語若怒其褻夫謝罪仍持故所投於井
婦亦差失瓢後腥惡不可飲及是復清井形似燈盃杓直
立頭刻龍首鬚鬣如動光采時閃掣

林良銓廣東拔貢雍正閒任大竹令有政聲陞崇慶州牧
告歸優遊林泉著有睡廬詩草取法皮陸得野逸之趣視
雕琢字句者高矣訪友不遇云去去五里程曲曲雙灣路
來訪臥雲人路迷新草護到門開三徑雲深花噴霧徐步
入簷楹犬迎聲不怒登堂殊寂闕几案饒詩賦稚子解留
賓有酒不須酤我復不強飲謂我莫自誤常時有客至爛
醉都無數感此興獨豪一飲傾三瓠日暮扶筇歸回首雲

封樹祖宅畱題付龍占姪云冬十一月歲戊午遲我衰年
得解組松荒三徑元亮悲山靈笑我徒爾苦我歸正值泣
寒天草衰不落迸豺虎宅前宅後坵壟多拜掃先塋陳酒
脯紙錢心事俱成灰蕭蕭白楊吼風雨五十年來人代謝
團沙骨肉不堪數有姪頽然臥草萊田園廬舍猶安主館
我一住兩月餘夜闌話舊弔今古我云今不與爾言誰識
宗功步祖武憶昔同生此地時花萼爭輝滿廊廡爾祖作
宦羈窮邊兄曹課讀慈幃撫而今墓木皆已拱更悼手足
如瓠窳顧我孤立成一身豈無他人終蹢躅那堪往事付
蕉鹿但得此心如橐腐榮期三樂已過之我今插花爲君

舞爲君舞月滿青樽沃靈醮海上兜率兩茫茫一局未終
失柯斧人生不合有此身無身何用逃元圃

川督一等威勤公勒保平定教匪勦績懋著時耗帑已數
千萬甫經奏功嘉慶十三年而峩邊馬邊諸夷出巢滋擾
勒公以馬邊勢尤猖獗不急治恐益滋蔓乃與提督豐紳
按察使方積分道夾擊搗其巢穴生擒數百焚殺數千擒
斬首惡嘉定府知府宋公以詩紀事云白狐跳梁黃狐立
穹廬吹角羣梟集十日涇河鴻雁哀 天書夜半來邊邑
峩眉遠在天一方獠花黯淡千山黃嶺夷十二足兇悍邊
民不得芻牛羊梁山有賊性如犬似鬼結蟻狂而張合沙

射影肆恠虐蠻天相望宵烽長自昔犯順干 天討十道

羽檄馳 明堂 天子按劍赫然怒 詔令征師屯大渡

奇兵制勝不在多摧堅餘自失其固鼓聲如雷下將軍龍

湖戰氣生妖雲方叔運籌世無兩指揮射落欖槍氛萬古

行人不到處落葉成泥蛇虎據自殺霜蹄饗健兒

方公殺所乘馬

饗士 丈夫義不當回顧銜枚絕壑無人知鐵騎飛來羅目

路貪狼失狽仍兇頑困獸人立山上山軍心激切士奮勇

同袍有誓無生還懸崖密箐險黑處殺賊不異草與菅三

窟倒翻兔亦斃魑魅落魄啼林閒日暮轅門靜桴鼓煌煌

裴相傳 天語止戮鯨鯢勿戮降 王師所在如時雨捷

書萬里報 甘泉 紫泥朝下紅雲邊傳來六月勞師意
歌到當時杖杜篇從茲邊塞安耕鑿春秋社酒盈山郭微
臣臥閣有餘閒雙峩晴翠當窗落敬博一語陳賡揚兵氣
銷爲日日光

陸光宗號古山浙江海鹽人援例入仕以軍功議敘好詩
工書談笑風流見者疑爲翰院名宿嘗見其與友札云獨
居於此不免寂寞且米鹽瑣屑聒耳煩心然無脚躡手板
之勞有讀畫觀書之樂日來圍梅破萼殘雪未消婆娑其
閒頗翛然自得觀此一段可知其概嘉慶十年任鄆縣表
節婦譚氏有詩云恆德以貞吉坤道以順成壹齊義不二

儼日誓堅貞懿淑譚氏婦婉婉嫺矜纓相攸協鳳絲在御
調琴聲辛勤鹿車挽的皜鮫珠明方期樹連理遽作鴻孤
鳴呱呱懷中抱旦旦廚下羹銀床自宛轉玉筯常縱橫盛
年何足惜大節在所爭青燈血一腔白髮霜千莖老冰不
受斧古井無波生輪軒貢熾俗綽楔輝高閎惇勸予所職
有善理必旌紀此式澆薄莫以諛詞輕古山後升酉陽州
告歸在道光十五年初古山遊幕來川就郫縣記室暇與
同事緩步二堂一友指公座曰安得坐此古山曰人事何
定異日安知吾不踞此座羣然笑之竟如所云子保亦能
詩捐通判

達縣李雯霽字九霞號棲霞道士少負大志奇崛不猶人
十五歲入泮一試不中遂不出恣情詩酒每有會意振筆
數千言暨乎情酣興發呼家人具壺觴極斟滿酌舉杯立
盡彈鋏起舞似醉似醒忽歌忽泣旁觀者莫測其意旨之
所在以豪放終其身其友潘宏道爲作贊云其人如玉其
才如花文章道學渾渾無涯生平著詩咳唾珠璣葩經神
髓李杜何奇性酷嗜酒藏之必从動吸百川遑云五斗自
幼至老清奇獨飽人住方隅名馳海島

潘乾隆
間進士

董方伯嶧山淳山東鄒縣人乾隆癸卯舉人令華陽時兵
丁孫占鰲挾微嫌鼓眾夜謀殺人於路公聞變往諭眾呼

爲青天不敢犯由是聲譽益彰歷陞至布政爲楊未禪刺
史題韓貞女冊云快讀歷朝貞烈傳綱常節義仰名媛未
婚守志事稱奇史冊搜羅不數見溫縣名家女氏韓瑤池
冰雪作心肝禱天封股療親疾孝可稱愚大節完世族楊
郎許結褵齊眉豫卜百年期嗟哉夫婿遭厄運英年夭折
數偏奇傳來薤露忽聞歌貞心之死矢靡他素明大義惟
從一此志終身不可磨慷慨身殉恨本深偷生聊慰老親
心含悲忍痛恩全報不二終當守女箴卅齡于歸卜吉辰
姑嫜相見婦呼新元裳素帔羅匱具木主神牌交拜人羸
得少殤綿祀裡還供中饋主盤殮未亡婦職兼男職更慰

重泉早死魂我聞妻道臣道共一途法戒春秋一一書君

不見馮道甘爲長樂老李陵生降不丈夫丈夫不可再表

茲巾幗幾長呼愧彼儼然冠裳者空負鬚眉七尺軀按貞

女河南溫縣人父勝祿宰臨海許字湖北保康令清苑楊

念劬長子汝雲未嫁汝雲死女矢歸楊家守節在家時曾

刲股療父疾念劬未禪刺史弟也徵詩題者甚眾

同仕一方萍水偶聚迭相唱和傳爲盛事後世猶想其風

流餘韻也睢州三蘇祠過者無不景仰見諸題咏幾與少

陵草堂祠伯仲制軍惠瑤圍齡首唱云名山原合謫仙居

四面巖巒畫不如曲徑松迷遊客屐平橋竹護遠公廬煙

溪邨樹投歸鳥日下溪田罷荷鋤憑眺漫嫌荒寺老暫休
塵鞅得相於結伴招攜指上方三蘇文采未銷亡樓懸遺
像虛帷動殿闕清泉古甃荒半嶺松風迴澗壑一林雲氣
滿衣裳旗槍試罷尋歸路小隊沿江踏夕陽永寧觀察石
梅溪作瑞云遊騎叨陪勝卜居行來真欲悟如如泉噓石
罅澄沙井竹隱松林護草廬一綫玻瓈分綠剪千邨禾黍
帶青鋤荷花想像秋來盛步障相傳宋室於生成玉水記
流芳舊宅新祠蹟未亡老樹當門依地主斯文終古破天
荒風穿密宇蘿牽帶翠掃空庭芰作裳那有一家人若此
木山三脊向山陽成都太守姚一如令儀云元戎小隊過

邨居一葉循行縱所如處處烟嵐通曲徑深深竹樹拱精
廬人間石爛泉盈掬天上風飛雨一鋤滿目山川經底定
笑他何處吝商於所謂伊人水一方南廊書散汴都亡掘
衣此日瞻遺址被髮當年下大荒綺語趨庭欣賜帶磐陀
贊像欲褰裳最憐近水魚猶黑隊隊啣花向晚陽州牧趙
退密秉淵云萬里功成淡不居大臣風度有誰如已先天
下憂民事更爲名賢式舊廬攬勝暫停花外舫行春預驗
隴邊鋤藝頤山色玻璃水仙觀簪裾記所於閒關百戰靖
遐方得失休論塞馬亡報國未妨文字業籌邊猶憶陣雲
荒洗兵舊雨霑花郡移節飛鴻趁繡裳他日集成頌一品

貞珉今已勒眉陽

按秉淵卽殉金川木果木之難作哲子以蔭授眉州刺史陞重慶府知府

孔昭焜字蔗莊曲阜人嘉慶癸酉舉人精明有才幹署中江時懲衙蠹除盜賊戢奸豪月餘四境肅然夜不閉戶後補開縣嚴明如在中江有奸民積惡爲鄉里患拘至縣將重責奸民大呼曰責吾吾不懼能活埋我乎君大醉怒曰畱爾終爲患爲一邑除害埋爾何難取棺至奸民猶崛強命蓋棺釘之立斃以是罷官上憲深惜之邑民至今思慕不衰題韓貞女云號公之臺何印印東門之楊何泔泔彼美一人堅且芳

解

韓姑燕譽柔嘉維則納其徵兮實維我

特

二解爰標我梅莫贄我棗中河汎栢舟繁霜浴蒼昊

三東

海石莫填南山并可磨兒父兒母髮皤皤兒死寡依將柰

何皚皚白刃空摩挲

四解

兒生何不辰一朝爲鮮民願言漆

室月畢彼青廬姻

五解

吁嗟乎長松易凋女蘿難朽并曰操

兮螟蛉負忠臣須求孝子門君不見貞女刲股療伊父

六解

古質得樂府之遺

渠縣李藝圃淑芳孝友剛正直聲播中外梓里父老想望
風儀比其歸也爭先快覩見其狀貌藹然温和羣相欣慕
以爲神仙中人而李恂恂自守在鄉言鄉若不知其嘗爲
朝臣者果郡太守承公勳夢以綵仗旗幟迎渠縣李御史
赴府城隍任次晨四月朔承公詣廟行香適李同年中表

營山陳君懷玉掌教朱鳳書院者在焉承公語所夢陳曰
然然此人方以內憂家居未聞有疾也胡爲來此問之果
於是日疾作矇矓語曰何來袈裟諸僧在堂前拜請家人
皆曰無之又憫然曰是是去去目遂瞑

爲將者殺賊報國作千秋忠義之氣其人雖往憑弔以詩
猶可愧懦夫聞幽光所補非小如清溪李華字明大渡河
指揮順治二年獻賊攻雅州李年八十四矣率七姓子弟
破賊于龍觀山後爲賊黨劉文秀所敗死之署邑令劉傳
經作老將行悲之云悲老將西風瑟瑟聲悽愴書生家法
作藩王賊逼城危惜兵餉元帥敗亡監軍降絕徼孤臣年

八十以首觸地秦庭泣君恩重如山北望皇都涕潸潸君
恩深若海慷慨微軀恨長在袒臂一呼義旗指敢告無能
今老矣甲光照耀黑雲頽雲頽欲委又欲起叩來綿亘扼
西南七姓子弟同日死嗚呼老將苦一抔土老將爲誰李
華宇

嘗讀明大學士王應熊楊貞烈祠記楊氏衣帶閒得絕命
詞嶄然如壁立金石爲摧然彼夫亡後自經也若遇強暴
甘蹈白刃其死更烈李伯祿妻黎氏本德陽人移居樂至
寄人廡下有無賴周某乘其夫出逼之不屈死縣令尤乘
元弔以詩云夫傭工妾紡織貧賤夫妻苦度日賃人屋被

人識強暴何堪遽相逼捉衣欲近衣已絕衣可絕節不失
奮身受刃刃盡赤怒髮風鬢死尤烈奪彼狂魂喪狂魄卓
哉大義明巾幗語亦峭健楊氏某中丞女名二姑其詞云
妾心一片鐵不與洪爐滅熒熒未亡人茹苦肱九折一死
鴻毛輕豈受風塵繼妾髮可剪頭可截

張氏名宜雝桐城人大學士英之後副榜磁州州判元表
之女原任直隸灤州知州蔡薰繼室夫沒於官氏扶柩還
岳時年方盛守志教子工吟咏有銜華閣小藁詩五言如
溪水湘羅碧林花蜀錦紅凝雲籠野水宿霧起遙岑蛇紫
香魂斷媽紅曉夢沉七言如黃鳥多情猶繞樹綠楊無伴

獨憑欄最憐細雨初勻綠多謝東風淡染黃細雨一簾紅
漸瘦輕烟滿樹綠成堆皆有風韻

昔白樂天蘇東坡喜與客遊宴而政益修舉蜀地江山奇
麗環成都尤多名蹟士大夫以時雅集非徒見熙朝文物
之盛而時當清宴爲政多暇亦韻事也昭覺寺古宣華舊
苑明時僧徒尤眾今雖荒落而殿宇宏敞可駐遊蹤道光
戊戌人日諸大憲往遊時帆多廉訪歡詩云知交三五偕
蘭若偷暇尋春飲最宜滿座泉香人送酒繞欄花影客催
詩共操舟楫逢多士暫假咍哦記盛時如此勝遊須盡醉
明年相聚恐相思桂林周諤餘觀察貽徽詩云聯轡出城

郭萬山來馬前東風吹面暖曉色助春鮮鳥嘯聽歌遠魚

閒知夢圓

同人環池觀魚

更饒清趣在照影水淪漣大幻誰曾覺

歸然古刹存基仍唐代舊禮肅梵王尊幡動心原靜香殘

鼎自溫禪宗余頗悅或許入斯門盛主張平子

是日主人爲曉瞻同

年招邀景正融仙帆迎海客

時帆廉訪亦號海槎

吟社遇坡公

蓋石前輩

倡議賦詩

內史書原壇長城句足雄

春綴觀察

穆如惟吉甫滿座挹

清風

賈夫前輩

笑我追隨久頻年屢暢遊橋平題處問碑老劫

餘搜綠意邨前樹晴光雪後樓明朝少陵寺花下詠重酬

翌日復有浣花草堂之遊

貴筑張曉瞻觀察日最詩云入蜀九年迷簿

領黃塵官道苦馳騁道旁佳氣何鬱蔥寺隱深林浮塔影

宣華舊苑久灰劫了覺道場留淨境一度經過一延望遊
蹤悵隔禪關冷閒身偷得早春天追陪勝侶真前緣華軫
相接征鐘聯平郊十里路如絃餘寒料峭破清曉旭景初
升晴杲杲碧林踈處紺宇出入門便覺塵根掃空王寶地
誇莊嚴遊客遐心耽窳窳幽徑斜從丈室通小池曲與迴
廊抱開顏索笑有花木忘形雜坐親魚鳥鉢盂持來洗腥
羶不惜齋廚供草草林泉竟日憺忘歸竹韻松風皆覺道
暮色蒼然煙漠漠僕夫整駕趨城郭士女駢闐夾道觀熙
熙意與吾同樂回頭惟見碧雲深隱踈鐘出林薄滇南
尹實夫觀察佩珩詩云入我門來笑我癡

門額爲藹
餘前輩書果然

臨覺覺先知雲浮在苒懷歸思魚樂徜徉悟息機

寺中池魚半皆

臥浮水面以手撼之輒洋洋焉而逝

幸附高朋臨勝境敢辭小草和新詩良

辰更喜今朝霽又用平康肇在茲古蓼王春綬觀察庭蘭

云人日畏春陰朝來倏已霽新詩誦劔南蹋磧夔人記良

辰得餘閒官解愁深閉快哉同心人招遊過蕭寺陽和候

兆纔已覺涼颼細我欣出城闕直至幽居地平疇莽空濶

行行踰林藪邨落徑縈紆再折轉而右深翠露紅牆紺宇

拓數畝蕭然松竹閒僧迎來八九引我啓僊都遺址古時

有側聞建自唐乾符歲丁酉重修溯康熙清俸捐某某昭

覺字煥然佳哉賢太守

寺爲太守冀應熊重修所書佛閣昭覺寺三字匾額至今尙存

闕東隅莊嚴做朱戶是爲方丈居曲檻通廊廡雜花滿院
香似欲媚菴主窗前列九華恠石玲瓏補中開半月池游
鱗悉可數元黃積百頭大者寸有五魚樂悟莊言逐隊盡
爲伍一磬座中落冷然心太古默默手自捫何如聽官鼓
遊譙非同心雅不如獨坐盤餐必肉食甘不如飯顆游倦
腹已枵筵開就廊左食譜偶翻新氣味除烟火大嚼涎欲
流狂言無不可禪理吾未知禪機吾尙頗爲問談禪人入
門可有我周藹餘觀察素精禪理寺門外新徘徊重徘徊
題入我門來四字匾額故戲及之斜陽上林杪長嘯歸去來徐步度芳沼一亭矗中央虹鏡
分流瀛殿外列僧寮無聲靜而悄豈緣境趣佳都爲塵根

掃彼髡自開開顧我徒擾擾十步九回頭琳宮暮烟繞一時唱和逸興有餘惜字句偶有記錄未確

遊昭覺寺之明日諸公出南門迎坐藏大臣因爲草堂之遊鰲石先生有記云戊戌正月十日立春王春綬觀察招何一山舍人學使李西漚宮贊多時帆廉訪尹實夫周藹餘張曉瞻觀察及余同集主客八人以立春草堂聯吟雅集分韻賦詩依韻爲次各書一通以誌翰墨回緣時在成都南門外少陵草堂也閩南蘇廷玉記溪南溪北春波急倒寫空潭放春入水可浣花地有靈千年香浸玻璃溼揚來勝境踏青陽不速之客竹林七招邀我愧東道人菜絲

充盤劇生澁座上坡仙興更豪不簪幡勝偏簪筆

是日蘇鰲石方

伯攜有筆硯等
其偶議作詩

謂藉尋春好覓詩詩不取佳惟紀實斯地

倘教句不成何乃闌入此翁室人生歲月能幾何過眼繁
華擲梭疾無語停杯獨有思巡簷悄對寒梅立一笑官如
傳舍忙啖芋誰當作李泌公餘日暇或重遊其人勝地那
堪必把酒默默祝東風後會還期似今日中州王庭蘭選
勝出城闌松篁映水濱詩尋工部宅香碎錦江春草色濃
於酒梅花瘦似人西園佳話在休笑跡陳陳未了前番興
重將韻事申丹青添畫本風日健吟身對我皆仙侶論交
亦夙因盛筵誰再續橋畔柳全新得春字長白多歡今年

春訊遲尤好江上梅花開獨早梅開好是浣花溪歷劫常
同春不老橋西潭北影橫斜殘月猶明天剛曉我來正值
早春初一簾芳信媚春草座中人比梅花清笑我風霜兩
鬢遠高吟據几愛坡公是日鰲石先生攜筆硯而來一時摘華爭採藻

憶昔曾遊牛頭山

山在西安城外三十里相傳爲工部讀書處

兩地清幽堪絕

倒古來懷抱讓詩人乾坤非大室非小一從背郭堂初成

錦里春風閱多少春風一度又一年花徑還擬再來掃得

早字滇南尹佩珩邀我嘗春酒春風花草香今朝好晴景

雲水照方塘盡醉攄懷抱高談隨羽觴主人情爛漫久坐

密金章

其一

宅入先賢傳百花潭北莊英靈如過隙達者得

升堂去郭軒楹做來時道路長經營上元始回首一茫茫

其濟世宜公等雲臺引棟梁不才甘朽質漁父濯滄浪芳

晏此時具終朝有底忙清聞樹杪磬且欲上慈航其得堂

字集杜句塾江李惺策馬城南去紅旗引路偏當春知酒

熟分韻有珠聯徑竹千枝直鄰鐘一杵圓草堂多竹浣花

非舊地風景亦依然草堂雖非浣花舊址而竹木亦極幽勝紅塵高十丈幽

賞又林泉竹徑蓬門地微雲欲雨天香浮梅有韻波綠水

無邊庭前紅白梅盛開堂一醉詩成後何須判聖賢其二同

到詩人宅前生有宿緣况當春富貴難得客神仙筆落飛

來句譚深醉後禪先生如可作許唱飲中篇同游八人得聯字

同安蘇廷玉東風昨夜來園林挈榼尋春春許尋城西共
謁詩人宅草堂隆古人猶今幾曲溶溶浣花水潔泐瀉出
行歌音紅白梅花競爛漫分題坐我花之陰有筆合當此
地攔飲酣面熱情難禁起爲先生酌以酒一觴旣盡還復
斟踈狂不怕梅花笑才有大小同胸襟何時置宅草堂畔
與公日日長歡吟得吟字桂林周貽徽錦堂春如海春郊
宜縱馬言尋少陵祠聯襪拜堂下緬惟締構初草堂蓋蒞
瓦卽今拓幽棲居然庇廣廈橙陰籠竹閒水石秀而野寒
梅初着花瘦絕增豔冶撫景動豪情發令總風雅談笑驚
座筵勸酬羅杯葦昭覺爲新咏珠玉紛盈把探袖出初稿

對客手自寫顧慚拙言辭數典窘持掄何當破萬卷再共

結吟社得雅字吳縣何桂馨未定草送客出城南長亭冠

蓋集

納鏡堂都護
由蜀赴西藏

乘興覓良遊招邀度原隰西郊有寓公

餘芳千載挹行過萬里橋一徑幽篁入花溪隨到門草亭

仍覆葺樓高恣登眺軒廣雜坐立曠達略形骸主賓忘拜

揖列席盛珍羞探懷門篇什佳興與時會茲辰正春及淑

氣乍氤氳條風已習習叢梅依檻香露草侵階溼豆麥滿

田疇葱蘢新雨裊時平吏有暇歲美民胥輯諸公稷契才

政教各秉執錦城根本地化被若嘘吸余馬望邛阪官程

催已急豈獨悵離羣邊圉慙綬緝依依此勝游暮忘返城

邑得集字貴筑張曰最欸仍其舊

康熙丁酉富順劉懋勳扶箕沙盤內大書我卽爾曾祖蓋
勳前明兵部侍郎劉時俊曾孫也問及後何爲又書曰我
未辭世前里人曉曉之語汝忘之乎先是里人夢遊洞天
見雷神列坐但虛一位問故答曰待劉時俊至果卒於天
啓丙寅至是乃云吾早爲雷部都督作二詩惜未傳按樊
龍據重慶劉公有功被謗人乃得白

劉錫申字晉三號藝圃仁壽人嘉慶辛酉拔貢由戶部七
品小京官遷主事陞郎中有御史請加四川田賦下部議
錫申倡言于眾奏駁之其事乃已尤長于詩著有蟋蟀吟

綠雲山館詩鈔在都懷故鄉山水蘭溪秋水云蘭溪不產
蘭掬水參蘭臭水清見魚苗灑然秋氣透伊昔釣遊時手
弄穀紋縵而今飽風塵安得枕石漱石城曉鐘云石城距
我家相去約三里城下眾峰環城上平如砥翠栢似旗幢
古剎凌雲起待漏憶家山鐘聲儼在耳豔陽洞天云古洞
鑿石壁仄徑穿幽林不見豔陽天伏日生寒陰傳聞張道
陵於此燒丹金我欲從之遊所恨山不深玉屏陰晴云玉
屏清且幽積翠堪入畫倏忽變陰晴雲光此靈怪樵牧習
見之忘是神仙界何日拄桃枝償此行脚債

周益齋名士溧土孝弟受業何二山先生之門深蒙鑒賞

由拔貢授中江教諭時教匪擾中江縣令懷印避去市民
驚亂益齋於城中架重樓曉以大義三日夜始帖然賊有
夜踰城者手刃之圍解大府欲上其事辭曰職陞官某令
休矣戴羨門先生謂同僚曰周君學問經濟粹然儒者有
大事可往詢之與王雲泉張雲谷爲忘年交涪州海山文
恭公與益齋通譜深相知病篤時屬子孫以師事之乾隆
丙午中式舉人任保寧教授陞甘肅環縣知縣不就少供
職四庫抄書多種著有古文集詩存甚少擬杜拾遺驄馬
行云房宿垂芒旦天久驥子彭彭墮地走天骨開張八尺
餘雲衢蹀躞誰驤首御廡如海養羣龍承宣勅賜出九重

圍人太僕競相羨錦韉玉勒何雍容喜值邊庭靜無事掠
陣衝鋒都不試且自驕行踏落花蟻蛭盤旋鳴得意眞賞
有人見愛深論價豈惜千黃金後有韋諷前支遁千載遙
遙共此心揚鞭幸免鹽車苦人馬輝光照今古追風逐電
任所之精神肯與駑駘伍新芻一束玉山禾千里關心瞥
眼過朝秦暮楚尋常事獅子拳毛詎足多過大相嶺憶昔
遊錦城西望雪山矗杲杲旭日升晶瑩奪人目四時冰常
凝列岫凍不沒云當夏日炎其流漲江瀆聞言疑信叅何
時得親矚謁來大相嶺寔其苗裔屬奇峰列巉峽寒流臥
飛瀑水與石鬪爭行旅艱彳亍彷彿棧閣中凌空駕以木

雪泥深沒脛清氣砭人骨古樹虬無枝陰巖蟠其腹上山
四十里絕頂難駐足一落萬丈強盤盤念四曲曲曲學蟻
穿巧墮山之麓竊疑造化初裂此封滕六又疑井鬼星寒
光返幽谷不知義氣尊西陲原慘肅我行半天下風塵愧
碌碌此遊實大奇快洗塵萬斛至木洞加餐小聚成村市
依山俯碧波眼隨江岸濶人是故鄉多細雨征衣潤旁風
竹瓦過來朝登小艇澗溯意如何春暮大風雨九十春光
盡油雲滿太空簷飛冰壑雨窗射雪山風把盞村醪碧圍
鑪獸炭紅秧針無恙否珍重問田功

陳瑞圖字思農江西弋陽孝廉嘉慶十三年任樂至萬壽

寺牡丹盛開屈明經崇墀邀集云流年難覓九華丹又是

一番春滿欄往事憶來如昨夢

蒞樂六載
三次到寺

今朝翻得未開

看花未
大放

况添花雨霏香界

是日
小雨

更有文章生湮盤山下黑

雲凝未散如聞羯鼓到詩壇戶侍王蓮洲炳瀛時爲山長

詩云一花一色一枝春記取河陽有舊因色色多增紅綬

豔花花環映綠袍新松陰斟酌千杯酒

屈子在
寺設筵

鹿苑驅除

萬斛塵富貴有根培植厚

屈明經多佳子
弟在寺讀書

紛紛細雨正芳

辰

蓮洲榜名愛嘉慶
甲辰進士安岳人

韓紹字雪門不知其里居慕子長爲人有徧覽名山大川

之概嘉慶閒流寓安岳被褐而談邑紳鄒楠周元位王應

鷓等俱折節下之未幾別去歌以金贖紹出境悉與道旁
貧者旋復來致書於鷓云王粲登樓之日淚滿青衫班超
出塞之年愁生白髮又云挹元亮之孤芳黃花秋菊親子
京之雅範紅杏春風其先與鄒楠畱別詩云愁心屢折金
城柳望眼頻穿玉壘雲後位等至都物色之不可得

樂至王氏羅某妻家素窘值歲大歉嗷嗷待哺無以爲生
某逼之行乞烈婦不可忍饑數日某又趨之行烈婦始終
不從遂投江死嘉慶十七年事也周原駱烈婦歌云饑死
不餐嗟來食渴死不飲盜泉水古來烈士以義死不道巾
幘竟如此羅家有婦王氏妹抱甕安貧相其夫一朝旱魃

天爲虐粒米粒金尙難活八口嗷嗷仰榆粥百里孤城少
親族官穀雖賤糴無錢縱市荆裙有誰欲榆皮已盡草已
枯可憐花容悴如鴿如鴿愁女啼饑切嬌兒更比女嗚咽
兒啼一聲腸一斷千聲萬聲腸寸裂腸寸裂氣不折百年
柴扉誓同穴婦無保姆不私行行必蔽面禮之節與其倚
門行乞驚村厖寧爲閉門坐斃身皎潔情憤烈忍淚別夫
與兒訣拊膺號天天不應投向江心影隨滅吁嗟乎曹娥
之手精衛之口不喪厥志各貞所守至今茫茫江水中烈
氣猶作崩濤吼志不朽愧殺當年買臣婦

金堂陳一泐與弟卯生一泐齊言爲宋梅生先生所賞延

之教讀後往河南就顏中丞聘病卒所著詩甚富歿于旅
邸集遂散失弟一津爲搜輯刻之客中云襍樹花飛又夕
陽大江東下浩茫茫不宜癡漢宜風漢莫當名場當酒場
客裏詩歌如過夢年來兄弟各殊方無因得似西堂坐坐
到無人春草芳在長安作東都父老送行來西望殺函一
線開隘地潼關屯虎豹炎天華岳起風雷五陵豪士今誰
在下杜詞人去不回我別長安還十日明朝重上集靈臺
九日與趙玉山登臨真是負重陽百尺闌干墮渺茫秋老
西山蠻雨黑江流南服熨雲黃三年作客思公子萬里雄
心檄夜郎木葉蕭蕭風颯颯不堪愁絕問韋娘天涯惆悵

是頭巾寥落吟民又酒民歸到故山如作客算來生計只
隨人諸公跌蕩談時事賤子迂疎合隱淪大好來朝天日

美各從鵬鶚出風塵

時游丹山
招飲屏浦

前任榮縣趙及菴名時山東萊陽進士同年戶部主政照
之兄也好爲詩在榮十餘年歸里不能具行裝謀刻詩集
不果藏稿不知尙存否苟以鄉人承乏其後恐散失沒其
心血搜得數首錄之聯床風雨等閒過浮世無如聚散何
孤館懷人知夜永病軀戒酒覺秋多禹王臺畔空黃葉光
武祠邊尙綠波正是菊花時節近龍山高會又蹉跎

泃城
旅寓

寄懷任愚溪單月樵昆
仲兼呈曹逸溪先生

潦倒無端入醉鄉夢回枕上憶林

塘小園雨過塵初淨曲沼風來暑亦涼自有愛蓮周茂叔

却愁騎馬賀知章解嘲新署頭銜在不是遊仙是酒狂

揚

荷花盛開單野南約往遊賞醉不克返隨賦此誌過匆匆又復事征鞍廿載奔馳爲

一官漸老方知涉世拙長貧更覺別家難庭前棟萼殷勤

護砌下蘭芽珍重看此去自憐還自壯丈夫有淚未輕彈

辭家北渺渺烟波愴客情煖風吹送扁舟輕青來遠岫楚

雲起綠滿平皋江草生旅雁逢春皆北向片帆無侶獨南

征可憐昨夜芳洲月故國池塘夢又成

舟中漫興

雙槳搖搖不

暫停南中風味客初經水環楚澤偏饒綠山入荆門更帶

青春店旗飄三月雨夜船燈聚一江星明晨應過武昌道

玉笛梅花樓上聽

舟中景

峇堯雉堞拂虹霓水作環玦山作

堤鄂渚烟生江漢合庾樓月上斗牛低風雄澤國紛絃管

花滿岩疆靜鼓鼙千載名城原犄角荆襄遙指暮雲西

武昌

青山迎面晚烟收江到山前更折流夜月何人遊赤壁春

風有客過黃州參差雉堞斜陽外浩渺鷗波古渡頭可惜

輕帆催去疾快哉亭上未勾留

黃州道中

陳仲玉名鎔涪州人其子章夏字吉士年十八應壬辰鄉

試父子同榜赴鹿鳴宴時方伯花曉亭先生見其丰采選

爲東床卽贅於藩署同時豔稱賀者如雲張俊夫克鎮詩

云堂堂大手筆文壇名早擅翩翩佳子弟奪魁自操券德

星聚一家五色雲霞燦月窟聯橋梓鳶蘿附枝幹蟾宮接
洞房嫦娥臨鏡看纔罷三條燭條牽五色線尙冀抱麟兒
接踵鳳池畔明年杏花紅宴排春江岸鶴鳴子相和彩筆
爲君讚仲玉癸巳聯捷進士出知浙江龍泉縣吉士以孝
廉終

花曉亭方伯杰貴州貴筑人所住之地名三塊田與弟少
年登第入詞林官御史立朝剛方嘗忝某大僚陰事有鐵
面御史之稱因是忌者亦多兄弟俱受知于吾東劉文清
公當時有謠云三塊田邊花兩樹俱是劉郎親手栽究于
兩公無損也嘉慶二十五年出知重慶陞四川布政後爲

廣西巡撫下祖母艱歸年已六十祖母之壽可知矣子詠
春官重慶時已入翰林燕春逢春皆少年成進士爲庶常
改官部曹曉亭先生之弟已早卒矣

紀蔭田太守曉嵐先生孫也監生由同知升歷署嘉定後
任敘州知府作芝龕記演秦良玉事爲傳奇表揚忠烈有
裨風化又作癡說闡四子書有發前賢未發處內有寄見
二冊精粹處似呻吟語切實處似菜根談家學淵源良不
誣矣曉嵐先生詩文集人多有之太守書刻於四川流布
未廣交河王九牧治夫分發來川行篋中攜有花王閣刺
稿一冊曉嵐先生曾祖厚齋所著也厚齋值明季亂離任

俠談兵負才不遇以諸生終其稿劫灰未燼之餘百存二
三吾鄉周林汲爲之序實能吐棄一切有云半夜倉皇接
報書開緘拍案一驚呼諸公至此吾何望天道如斯古所
無欷枕沉吟連夢寐挑燈絮問怪妻孥披衣啓戶看乾象
黯黯寒星數點孤蓋爲楊左諸公死闔禍而作不着一字
而悲憤嗚咽如聞其聲喜旌吾弟自真定夜歸云隔牆一
喚驚還喜半夜汝從何處來攜手都忘閉門戶禦寒先遣
洗樽疊音書雖近無人往道路多虞幾度猜此日生歸是
天幸旅顏消瘦未須哀蓋喜其從亂兵中歸情真語摯無
限曲折一氣寫出詩家白描高手太守不以科第起家而

學問湛深固本於曉嵐先生而厚齋實紀氏之星宿海也
附記于此太尉名曉嵐

川省各邑皆有川王廟有以爲灌口二郎神者二郎秦太守李冰之子佐父治水有功冰有祠在灌口旁有川王廟土人以爲李二郎對廟有趙公山按隋趙昱斬蛟在嘉州或云在犍爲宋封川王清源真君則川王應爲趙公相傳隱於趙公山故灌口有祠宋時二郎廟亦極盛合爲一則誤矣有識者多辨之有巫者降神大書於盤云煬帝宮前草秋來不復青苑中螢百萬散作雨餘星詩之妙非俗巫所能假托或云川王祀李冰又有江王廟祀馬謖者報功

盛典命名或淆不可不詳也

榮縣張懷瑾字璞園才調翩翩丰姿玉映同人以遠大相期在書館夢自嘉州乘舟順流而下不知近遠舟既泊岸緩步江皋見蓮花盛開有兩美姝翱翔其閒尾之入一洞遷延窺伺有老叟延入諮詢語甚洽知所見卽其女也贅張於室且延師課讀恍惚二三年之久偶出外遊覽倏至已館二女先在題詩云遠隔嘉州路幾千扁舟一葉擬乘蓮人從洞裏穿將去料得人間別有天意猶戀戀突然驚覺方悟爲夢而情景歷歷猶記其師姓胡是年爲道光乙酉拔貢朝考入都病歿年纔二十餘

四川癸酉鄉試諸生扶乩問題及科名仙判云今科解元
本姓向若問題目在天上莫亂爲莫亂想眾茫然揭曉元
並非向姓題爲既庶矣二節是題康熙四十七年戊子科已出
過解元成都向日貞也第二題日月星辰繫焉始悟在天
上之說而三題則無爲其所不爲無欲其所不欲無不奇

驗

科名有定數高縣張九皋嘗夢中得一聯云靈根何處托
陰雨畫圖閒醒後不解所謂及壬午鄉舉第八名前所住
店欲掛文魁扁以爲榮取舊易新舊扁乃庚申舉人陰雨
所也扁後壁上畫太極圖乃悟前聯早爲之兆矣

觀察成綿李海颿先生宗傳安徽桐城人在蜀提唱風雅
一時僚屬多以詩請業先生親爲指授爲之月旦作滄海
釣鰲圖題者如雲閨秀詩別爲一冊無錫丁采芝紫華云
手掌絲綸超絕頂心存舟楫濟斯民綿竹李錫桂月樵云
偶浮碧漢槎爲艇直取丹青月作鈎羅江趙雲霞綺仙云
妙手當年傳射虎前身此日悟騎鯨笑他釣雪寒江客蓑
笠孤舟過一生後擢山東按察陞湖北布政司告歸子景
枚選四川德陽令以艱歸

內江王綠泉果知山東武定府才具明敏疾惡甚嚴怒劣
生某剃其一眉去鬚半邊以綠紙糊衣帽使着之押遊城

市既畢劣生詭請衣帽藏之願爲終身戒遂挾以叩闈因是罷官上憲奏畱不得所爲時文原本正嘉一掃時調刻有盤峪山房存稿子丹去年秋闈落余房薦而未售現以學博保舉知縣綠泉太守年逾八十聞猶健在

孫東屈益廷山東濱州人由部郎出知綏定府最愛才閎各縣試卷佳者招至署親爲指授在館常二十餘人皆少年英俊多所成就如探花江小帆國霖前任宛平縣胡笏山銑部曹王小泉正誼外膺鄉薦者復十餘人小帆亦號曉帆工詩自刻時文追溯淵源志東屈之訓東屈夫人諸事曉暢諳練青綾帳中談鋒最利雖東屈亦就約束焉告

歸後卒

福建同安蘇鰲石先生廷玉初爲蜀臬歷陞制府後復任按察今節相藏山先生甲戌會試所取士也師弟以總督前後交代李石梧先生星沅遷蜀臬時亦與師張曉瞻先生日最前後交代皆稱盛事鰲石先生少時家寒年十六考書院文童二千餘人時蕭山王公南陔權府事拔先生第一後取超等第一者六丁卯闈後還里遇王公於路已陘道憲矣先生草履肩襪被避之不及呼進前索橐中文草視畢決其中予以洋錢兩枚不受欲延入署教讀亦不願問故對以官場應酬誤功且恐變寒士之素深嘉其有

守既入翰林改部王公已陞巡撫入都請公飯供魚肉鷄
鴨四品曰家無廚役此門生婦手自烹調者公悅爲之飽
後出守蘇州公遣子命題畫冊甚稱其詩公歿後先生將
訪其遺集刻之可謂有始終矣先生善書應酬不倦嘗見
爲人書扇錄舊作七絕數首風華掩映不愧玉堂人物七
夕詩云會少應知別緒多鵲橋今夕許凌波人間萬里千
山路翻羨雙星祇隔河自註云丙申隻身在蜀故云詩別
有風韻翻盡前人窠曰里居時見有咏織女詩云年年一
次度銀河日日難拋織錦梭人願成仙天上去不知天上
別離多各有寄托

年羹堯爲大將軍侍衛墜鎧總督帶刀稟見州縣跪接任
四川總制時僚屬已無不震懾新津令王汝驤以不能誦
事去官未轉瞬而年以橫恣敗矣王以一介寒儒名滿天
下顧世知其能文而未知其詩陶雲汀先生敘其集稱詩
近王孟惜爲文掩本朝以時藝著者莫如熊漢陽劉黃岡
二公詩皆古雅可傳韓慕廬宗伯詩集亦非淺學所能追
步而世但推其文蓋時文科舉之習獨趨所重耳

遂寧張文端公守兗州日以少子贅孔氏遺一支於山東
船山先生往拜太夫人墓存問族姓有句云萊州太守兗
州人先生又生於館陶遇山東居官者每稱同鄉蓋以此

也與蔣大令伯生因培善伯生先人亦官山東故自幼流寓齊魯後宰滕縣蹤跡略與船山相似有才名工詩任誕不羈方伯某招致於署夏日裸臥園中亭上方伯至突起立侍云卑職放肆付之一笑而已蘇鰲石先生爲東臬有卷長三丈許諸公題咏多長篇鉅製伯生題七絕一首蕭淡簡遠有雅人風致船山則夙已辭官歸矣

原任浙閩督憲鍾雲亭先生祥廂紅旗人初知山東濟南府歷陞總督以失印降調來川爲方伯潘中堂芝軒先生以庚子春闈卽事詩索和云叨持玉尺記三三老矣登壇興尙酣

自註典鄉會試各三視學者三

到眼是花迷五色盟心有月印千

潭曲高難得知音賞味美爭如說士甘門外紛紛盡桃李
要從緝錦認榷楠贈同主試諸公云四座欣逢益友三
飫聞高論興猶酣澄懷各有千秋鑑雅量真同萬頃潭看到
奇文燒燭短投來佳句飲醇甘掄才當代推宗匠第一春
風被楚柵又贈分校及門試竣贈諸同人示公子曾瑩喜
公子曾綬登賢書凡六疊前韻瀾翻濤湧能者對之亦變
色失步方伯如非勁敵肯以偏師橫挑乎叅政卓海帆先
生亦以畱京奏雪疊己亥十月得雪詩原韻索和警晉楚
爭霸之師交發並主處其閒者疲於奔命而公政事之餘
從容肆應是爲難耳鍾係漢軍

中堂名世恩伯父行榕舉
鐵華先後成進士癸丑先

生大魁天下丁卯從兄琛探花及第聞其先某公多厚德除夜有偷兒入室視之鄰人也子甘金勉以戒賭後得吉慶即鄰人地因戲焉鼎甲接踵非偶然也

協揆卓海帆先生秉恬字靜遠華陽人嘉慶壬戌進士遊仁壽古佛寺云一逕入危石亂松青到門隔花僧影澹穿竹鳥聲喧殿古藏雲氣簾高見漲痕偶來尋斷碣零落字無存辛丑畱京辦事十一月初十日奏雪疊乙亥得雪前

韻聯步東華踏碎瑤祥霽片片應時飄歡心鼓舞朝還野密勢續紛夜及朝六出恍疑花發樹雙歧預兆麥抽苗飛章馳報天顏喜蹕路謳歌一氣調敦甫協揆見和再疊前韻佳篇宛似報瓊瑤霏屑紛紛著紙飄風定挑燈還昨夜

雪殘待漏已連朝

本

派雷京者四人

莊邸

湯協揆奕家

集於文華門內

事申刻始散自十一月初四至十二凡九日值

宿各三夜惟家宰不值宿午刻先出

禁城

民生托命

勤占歲國事關心盼格苗

時定海尚未收復

職長六卿資

燮理八方元氣仗公調今陞體仁閣大學士

子雲道光庚子進士翰林

院編修

鬼孝子盛姓榮昌人家雖貧甘旨無缺年二十許暴疾卒
既葬屢見夢於父一日午後空中忽墮一鷄父大駭片晌
悟其子所爲責之曰爾雖有孝心然竊人之物以養親不
義孰甚焉是夕復夢其子曰父責兒良是然親老家貧死
且不甘父但誼傳亡兒能言人禍福以是獲值陰騭無傷

也父然之於是里中爭傳鬼孝子有某姓者昆仲四人三兄皆以心痛卒其季又病乃往問之鬼孝子附言曰爾祖葬某所棺且朽有樹根直貫其心亟遷之可不藥某姓啓其棺一如鬼孝子言改葬之病遂瘳由是聲傳遠邇問者接踵日獲米豆數升錢數百文以養父母後父母俱歿鬼亦隨滅

謝果堂太守父薌泉先生振定爲御史時途遇和珅之妾弟出語不遜杖其人焚其車以是罷官直聲震天下果堂太守引見時知其爲焚車御史之子 上深嘉焉陞陝州卽擢知四川敘州旋調成都薌泉工詩古文嘗欲選國朝

古文搜羅甚富袁簡齋見而奇之以已所集八十家文付
之使刻未及成在京與洪稚存張船山唱和船山和蜀女
吳碧蓮詩薌泉亦和以長篇集中未載果堂太守見四川
通志有其詩乃補刻入集詩云粵峯縹緲橫青天湘水冷
冷淒鳴絃巫峯千里雲綿綿靈風夢雨來飛仙驚沙走筆
何翩翩吟魂杳杳凌蒼烟自云埋玉湘江邊東風何處思
華年怨魄天涯悲杜鵑二十三絲驚四筵有客臨渚懷芳
荃青山怪石意拳拳碧沼幽香撫遺編曹娥碑冷鮫綃傳
琵琶聲斷紅珠漣珊瑚鐵網迷重淵他時銀管貞珉鐫置
身玉鼎秋華巔我生弔古沅江壩美人芳草遺真詮歛欽

東海呼成連萍蹤邂逅幽絲聯詞壇白戰供清研讀君佳
什清且妍碧城迢遞哀嬋娟閣筆浩歎迴雲駟翔風淒冷
吹歸船漫空雲點飄花牋我醉長歌君扣船回首春山空
惘然果堂太守歸里安縣令徐鳳樓爲作春江返掉圖自
題絕句四首錄其二云收拾春光入畫圖情詞繾綣有吾
徒片帆遍挹千山綠僥倖湘南一腐儒遨遊江漢意難禁
四十餘年舊路尋吳水楚山資放浪極娛情處亦灰心題
者亦多不具錄

彭時清忠州人乾隆庚辰 恩科舉人任山東郟城壽張
縣令精明強幹獄經數年不決者一訊卽服後陞慶陽知

府同邑有杜鶴翱者以翰林改工部主事繼娶唐氏年二十就婚于京花燭之夕工部暴卒唐扶輓返里歸江夏母家甘貧二十餘年子迎歸彭爲賦詩云浮雲乍捲滿庭霜慘目驚魂祇自傷綺閣新燈垂燭淚韞車促輦斷羊腸零廿載倚修竹寂寞三春典素裳青史何人堪作傳白頭扶病獨歸鄉萬壘千山暮靄浮栽籬補屋守荒坵了無婢僕牽蘿蔓賸有詩書載石樓珠箔燈殘霜月夜翠屏風冷碧梧秋酸心莫教猿啼碎隔岸聲聲是賣愁

富順李吉山芝乾隆戊午中式第二或謂其入都會試經過河南見壁上題名錄遂悟前生吉山自辨其非而以爲

事非無因蓋傳者失實而前生事則確有端緒其時偕同人至新鄉旅店早餐有老人問訊泣述昔有子讀書聰穎入泮後亡今二十年矣昨夢白髮人謂汝子生四川李姓家已中第二今早過此可相見時吉山正二十其生月日卽其子卒之月日也邀至家啓篋示其子舊文則場中三藝皆在焉見母及寡妻洒淚而別北上不第再過二老已亡哭奠畱數金戊辰中進士選山東招遠令迎故妻於署養之終身旅邸匆匆語黯然三生如夢有前緣金環認取登科後可補人閒缺陷天青鸞幾載歎身孤一霎輪迴記得無憔悴形容猶護惜不同山下採薜蘿

署新津時閱縣志載童少尹事文甚美因錄之少尹童永
年康熙四十年春勘地過餘波橋沿溝行進山數百步至
蕭家山憩息林閒甫欲假寐見侍女數人衣飾華美言夫
人請公隨之行樹林蓊鬱芳草繽紛道僅尺餘其潔如洗
甫入門一徑屈曲傍砌青石中嵌小石子皆成花樣兩邊
種蘭蕙清香馥郁沁人心脾正廳一閒書畫陳設俱非近
代物回廊數椽丹繪精工庭前花塢魚池楚楚有致方顧
盼閒夫人已降階相迎年可三十餘言貌端莊使人望而
生畏自言李姓夫爲前明布政使居於此有年矣與君有
隣誼故邀一飲治比之日甚長也獻酬閒一切物具皆精

緻絕倫南味數品雜以野蔴山餚無不精絕飲畢送客出
公覺而酒香猶在口回署未匝月卽有藏差時雙流歸併
新津土曠人稀艱於迎送以民爲夫縛椅作肩輿東接至
簇錦橋西送至楊家集人與騎不稍離饑則差役於站頭
熟雞子倚馬以進過署不入者三越月差竣而飯不下咽
矣遂卒形家卜地至蕭家山吉遂葬焉

陳卯生一津與兄竺山一泃齊名閩中陳秋坪登龍著蜀
水考卯生爲之逐段分疏人服其綜核著有收聲譜藏于
家博雅好古一時無兩聞聶蓉峯學使耽風雅入古場題
爲司馬相如題橋賦洋洋千餘言一揮而就文不加點亦

未起草賦學騷體古調獨彈覆試高山流水賦又作短箏
僅三百字亦古體也學使大加賞贊評云以奇古之筆寫
高曠之神鈞天一奏羣喙皆息首場賦評語甚多末云視
唐人無名氏舊賦規模大小迥不侔矣立卽刊刻入場者
人給一紙聲譽赫然以貢生終前歲始卒年八十餘矣雅
安令陳秋坪合序其兄弟詩集今竺山集單行明生有吾
鼎齋詩集黃梅樵以薛洪度小像索題爲作二絕句云名
士最憐蘇小小內廷曾識李師師而今粉黛風流盡畢竟
畱傳一卷詩荳蔻葳蕤二月初少時歌舞管絃餘誰知老
後吟樓上賺得頭銜署校書草草應酬晚年筆也陳秋坪

云卯生詩靜穆讀其五古頗有靜穆之氣寄秋坪登周公
山望峩眉云朝度周公水夕上周公山我行亦已倦竟日
躋其巔始發天未曙眾星何爛爛山精耀光彩駛若鬼火
然雷電倏明滅陰晴俄變遷蒼茫失往路天雲互相連須
臾改朝旭極目寒晨烟無由生羽翼欲步不敢前支杖歷
危峭岌岌梯累千斜陽迴林薄一笑吾乃仙上方不可到
到來頗亦好回首俯塵寰下方已了了我本世上人心期
烟霞飽早歲懷神仙平生企梨棗幽巖采琪花危徑拾瑤
草試問今何時萬事奚足擾但恐轉法華翻能迷大道若
教桑田深瞬息滄海小側聞古喬松服食不曾老如何商

之山復有采芝皓登山極四望峩眉特
淹謁靈關前門
涇水繞襟帶茫茫古梁州玉帛同禹會蠶叢一閉關隔絕
竟千載自從漢志來得蒙復望蔡烏萊例和夷詎知非兩
大我得鄭老言少見亦多怪繼讀桑欽書符節合宗派乃
知青衣羌闕國異今界此山固崢岿一宿恐難再

提督胡公名超字卓峯長壽人由行伍起家從征教匪滑
縣之變地雷破城奮勇先登又勦陝西南山匪徒道光三
年勦西寧河北賊賜勁勇巴圖魯六年調赴阿克蘇等處
授重慶鎮總兵追賊至噶爾鐵蓋山張格爾恃險負隅棄
馬攀援直上步戰殺賊張格爾見事急欲自刎乃奪其刀

生擒之陞甘肅提督圖形紫光閣爲平定回疆十四功臣之一廿一年調赴天津防禦海上卓峯以武功顯雅好文墨著有訓兵要言軍餘紀咏嘉慶己未罷官里居時借紳士倡捐賑饑全活甚多有詩紀之是秋大疫人多死亡又捐棺二百埋葬作詩云亢旱驚聞癘疫傷填滿委壑倍悽愴憐他露骨迷東郭爲爾埋背弔北邙肯使幽魂悲冷月豈教孤魄泣殘陽故園任郵風崇古漫說桐棺七尺香嘗掘地得銀每錠鑄超字奏 聞仍以賜之長子允林現爲部郎次允柄廕主事

傳云羅申望讀書江東廟中一夕燈光似有物障之慘淡

而不能燭字申望禱于神忽閃然是夕夢人曳之入甕中
驚覺自意將有變生禍使人甕多長醉之兆不爾蜉蝣一
生恐爲甕裏醢難展轉通宵詰旦以告友人友人曰君自
此升矣豈不聞甕裏乾坤大乎申望終不豫後以歲薦需
次入選得甕安令始悟入甕爲甕安兆

大竹王以確士品子康熙戊子舉人雍正年間赴都揀發
集太和門奉 旨條奏時務同時三十人引 見時獨蒙

嘉獎謂切中時事簡便中自具詳悉奏對踰時將摺發浙
江總督採擇行之微冒奇遇也遊雲霧山云行行二十里
已至山之麓根老百株松泉飛千仞瀑識韓衡有路棲柳

愚無谷穩步度前溪莫愁暗虎伏峯轉疑無路山連忽似
龕縈紆九磴折曠渺一心涵冷翠攀崖竹孤標坐石楠黃
精叢玉綠未見有彭聃聯雲梯百級騰踏步空虛呼吸通
天近煙霞隔世疏眾山螺髻出萬壑龍泉瀦舉手謝時人
好鄰兜率居一勺曹溪水瀾茗味正濃斫松炊野蔬煨芋
供晨饗盈幌早窺月殷牀晚聽鐘催歸杜宇急暫假壺公
龍

古重隱士非槁首窮巷遁跡荒山爲可敬也不貪不義之
富貴方爲品潔行高逵縣李模字克振居貧力學康熙戊
午吳逆僞將軍據蜀開科堅臥不起著詩二十卷足跡不

入城市州牧李舜卿温而遜徐原本皆贈以詩徐詩云蜀
中名勝甲寰區山勢嵯峨水滌折鳳嶺東來更蜿蜒應有
高人推奇傑古調於今能獨彈品清目濶行孤子經猷夙
抱擅才華更兼文章罪玉屑晨風夜月自蕭然力謝浮名
棲巖穴偃仰懶與世周旋嘯傲林泉甘守拙余也無才刺
通川久慕芳躅願見切偶通尺素致殷勤城中希見先生
轅聞說衝泥冒雨來論交不以余爲劣余亦與君賦性同
流水高山絃不絕原本奉天人

綿竹黃步青字漢南號鹿堂乾隆庚寅恩科舉人由成都
縣教諭陞潼川府教授引病歸自號晚香齋老人植花種

竹以詩酒自娛春園漫興詩云春風從何來吹我園門開
園中何所有老梅與蒼苔苔岑同氣味而此異崔嵬梅花
助精神無復雪皚皚有酒姑自酌有詩且漫裁閉門留春
風相對默無猜我愛嵇叔夜心唯樂魚鳥酬答懶作書常
恐人相勗奈何世俗情缺此反致惱所以白太傅漸喜知
聞少謁南軒先生祠因懷魏公故里次壁間原韻中原竟
斷大河南洒血孤衷孰共探一代長城悲孝廟千秋憾魄
繞衡潭每懷祠宇澆明水悵望松楸隔遠嵐大節如公昭
信史在將成敗肆空談少年器識出風塵理學文章事共
新幕府高名叅子弟經筵講論著君臣楷模自昔垂桑梓

俎豆於今普士民儘有辨香貽後學何勞剝鮮悵殘珉嘉慶丁亥猶健在

虞雍公允文長江一戰再造宋室墓在仁壽縣邑令李元有詩弔之云長江天塹浪拍空金焦兩點鎮江東南宋人失黃河險偏安臨安不英雄海陵督兵五十萬高臺旗颯噪北岸剋期渡江刑白馬采石磯頭鑿水戰顯忠未來王權去殘兵坐哭軍無主今朝躬擐南朝甲明日白骨拋江滸何來書生虞舍人策敵從容不顧身忠誼一呼將士起戰舸戈船五路分海陵左蠶坐龍艦殺氣衝空雲黯黯絕江瞬渡十七艘天風助勢萬聲喊吳人乘舟信指揮餘皇

却似紙船飛伍胥排陣擁潮立馮夷擊鼓潑浪催帆檣樓
櫓軍容壯神臂勁弓隨所向解艫人頭漂棗栗血染白波
翻紅浪龍艦迴師揚塵走宋旅懽呼楊林口聲色不動頃
刻閒書生忠膽大如斗劉錡無病顯忠來帷幄參謀帥府
開力控海陵吾亦許安有速成如此哉雄心折盡海陵死
金人不雪喪心恥從此吳山第一峯立馬高歌終趙氏

京山舉人嘉慶六年任

周篋谷名士岳士孝弟嘉慶癸酉舉人居課徒采栢子
焚香日讀黃庭離騷一過授岳池訓導掌教書院不受修
脯人謂與篋谷靜對令人矜躁俱釋詩雅淡善隸書得其

尺牘多珍藏之自訂餘歡堂稿父萬殊判岳州時生篋谷
故以岳名之官終岳池可謂以此始以此終矣趙家渡客
舍瘦馬驅長道投鞭每暮遲那堪人雜沓况值雨淋漓屋
小燈猶暗羹殘腹更饑無錢沽白酒吮墨自題詩斗室剛
容膝難爲旅夜情牀頭蛛網結屋角草蟲鳴客路身常健
鄉思夢不成更闌人語歇着意聽雞聲畱別六兄十年方
聚首倏忽唱驪歌秋意清如此予懷悵若何荆枝隨地秀
雁字遠天多不盡相思處魚鱗次第過六十初度酬益齋
兄我有嚴師長薪傳仗阿兄衣鉢粗能繼許武成弟名石
田惟一硯八口以資生爲我謀館穀聚首赤崕城兄老我

亦衰歲月去崢嶸六十逢初度拈詩侑酒觥毡寒姜被暖
子行次第賡自慚骨相薄難期軒冕榮但遂天倫樂枝葉
燦田荆甲子從頭數晚節礪邁征喜兩行老龍抱珠眠重
淵胎食胎息安於禪睡聲如調混沌譜泥蟠人已傲飛仙
條聞地元詔語切原田龜坼人憂煎振鬣翻身噓氣起黑
雲翻墨紅輪邊倒捲黃河飛作雨萬斛膏乳瀉平田白羽
大箭排空注簷溜百道飛流泉荷池碎勺催戰鼓崩崖轉
石雷填填既沾既足郊原徧餘霧猶鎖層山巔一雨三日
伊誰力歎嗟氓盡歌豐年祠前稽首羅酒脯金爐裊裊飄
祥烟龍不矜功仍歸臥豐亨自昔由蒼天

李立齋先本綿竹李价人之嗣也援例捐鹽知事秋夜感
懷云細雨瀟瀟坐晚涼爐烟篆歇嫩添香人生百歲猶嫌
短客別三朝已覺長雁影邊風辭北塞蟲聲夜月入西堂
病軀瘦去愁看鏡鏡裏人愁髻帶霜贈成夏圖見過云徑
訪三三續舊緣重陽雖過菊猶鮮黃花似我甘稱隱白髮
如君合號仙著作等身畱姓字功名垂老付雲烟醉來且
把桑麻話笑指門前數畝田妻佩香乾隆戊子舉人溧陽
令侯起元女亦能詩兼工琴奕有句云燕知隨客遷新館
犬爲憐花守舊門與外咏菊云情馳夜月空成夢人對秋
風欲斷腸初秋七絕云蟬聲如醉野花鮮料峭微風上袂

緇不是寒蛩吟暮雨分明二月嫩寒天年僅二十五而卒
詩集名夢湘吟館自題云此身同水月有夢到瀟湘

陳廷璠號六齋涪州人以孝廉補粵西藤縣素多盜捕戮
殆盡偶乘舟外出泊荒洲寢後聞有人連呼速起披衣開
窗起視無人旋聞舟前羣盜洶湧而來踰窗登岸匿林中
賊入執役問官所在入見衾枕宛然疑其尙臥眾刃交下
碎榻而去後偵知官竟無恙驚爲神佑盡避去民爲立生
祠昔吾邑有人送友某之巡檢任有句云白水洗清心蓋
勵其廉也所治蠻荒多盜文網疎濶某捕治甚嚴羣盜仇
之夜入署戕官剖其心攜去洗以溪水竟爲詩諷如陳公

者亦危矣

曲阜復聖之裔多聰明特達修來先生兄弟以詩文名天下後有名崇鴻者號酌山乾隆戊戌進士授編修升侍讀丙午爲四川正主考題爲東帶立於朝闈中有倒領下句中式者房考與主司俱未覺揭曉方悟可知科名有定是科南川周肅齋先生二弟一子同榜李兩村弟本元亦中式酌山工八分善詩與兩村詩友也時方家居以八分書詩貽之有句云名園傍水多栽竹小榭聽歌好放船因兩村新治園亭素喜音樂故云在都時與程魚門曹習菴吳鼎雯諸前輩唱和嘗偕訪兩村通永道署登大光樓酒酣

索筆作歌云玉河橋上車轟雷長安城中十丈埃炎雲如
火午風熱登樓要醉青蓮杯延陵公子頗好事鼓舞遊興
呼朋儕出郭眼界一空濶輕颺披拂蓬半推戲波拍拍簇
鶯鶯夾岸陰陰交柳槐一葉順流不炊黍候吏已在州城
隈主人歡迎未暇揖亟命選勝開樽壘大光之樓聳北郭
憑闌一目何雄哉居庸大行儼羅列灤水一帶遙環迴神
京西望天咫尺五雲縹緲瞻蓬萊九關密邇資鎖鑰萬國
朝貢從溯洄信矣幾甸此重地坐鎮宜得如君才君家西
蜀謫仙裔淋漓大筆唾鄒枚頃司文柄自南粵嶺海奇秀
豐詩材畿東觀察任繁劇文章政事能兼該其書滿家富

著作搜討源流披根芟考訂精審付剗劂要公同好流埏
垓一行作吏此事廢如此雅尙誰與偕走也芸館稱後進
庾樓高宴欣趨陪尊前嘯咏極清興西山不覺朱丸頽京
華數載恆刺促茲遊暫使煩襟開冷官亦苦職司縛惆悵
緇塵歸去來聊紀勝遊寫長句艾焙幸免涪翁吟詩成文
不加點酒盞尙溫一吸而盡捫腹大笑雨村素以敏捷自
負瞠乎後矣詩集甚富選入續山左詩鈔

錢塘姚德基號喬修以通判加知州銜在川屢署劇邑題
謝果堂太守春江返棹圖七古一篇最爲擅長匆匆未錄
嘗以出京詩一冊見貽其尊人亮甫先生祖同由河南巡

撫入都後作也時在道光己亥五古淵雅可誦知其家學
淵源略錄一首少年慕遠猷壯志吞八極惟思練勞筋遑
屑問安宅退食承明廬打頭甘偏仄身行半天下傳舍八
州厯豈無連雲榭燕寢足棲息蕩析愍民艱我意常不適
都門弭歸轡苦復一枝覓一年三卜居踏遍長安陌歸然
聽雨樓興廢幾陳迹往偕朱老遊叩門勞欸客不知身是
主高臥擁百尺余道光二年壬午來京師朱八野雲鶴年
為談聽雨樓勝概邀余觀覽余會賦七古
一篇朱為補圖相贈迨歲丙戌此樓適為余有不可思議憑生悟有定思議窮難及漂
流復誰恃感荷 天地力瓦礫平故墟軒窗豁塵壁嚮來
歌鐘地寂寞燕游席舊物發經嬴閉戶永朝夕漸喜蘭桂

滋環階吐新碧勾留豈不佳老矣念鄉國木水有本源忍
不做廬葺臨別語諸孫鄭重仰題額端安揭兩字在在為
曾德杭城端安堂卽先世五桂堂舊基先祖始易今名安貞堂則先君邦江舊館所顏額也敬念前型
兼承勿替幸獲風雨庇勉副堂構克要知詒燕遠勿改旋馬罕
耿耿願未酬廣廈萬間闕

客言李叅軍心衡上海人爲諸生見賞于劉石菴先生後
官四川綏靖屯最久輯有金川瑣記四時詞云獨松成野
草初生半畝園中鳥自鳴邊地只今多雨露家家火種又
刀耕泛泛皮船逐怒潮輕輕竹笮度危橋誰知六月荒山
裏尙有千年雪未消甲索山空木葉稀金川水冷雪花飛

短衣匹馬追狐兔，徼外秋深正打圍。釀來唾酒不須觴炙，
得猶臆分外香。蠻俗也知歡度歲，盧笙銅鼓跳鍋裝。鎮江
許文雄醉後贈以詩云：弓衣斜壓赫連刀，疊雪山城虎嘯
高。將略詩情堪自許，一時意氣爲君豪。塞雲高捲五營連，
壯士齊歌敕勒川。繡額蠻戕紫辭翰，定知人羨李屯田。二
詩風趣甚佳。

廣安州鄧遜齋時敏，官大理寺少卿。乾隆戊午入闈，袁子
才出其門主考，則吾鄉大學士仁圃趙公國麟也。子才於
遜齋師誼甚厚，屢見於詩，而於趙公未多及。蓋公入闈未
久，以細故罷歸田里，蹤迹疎濶，平生著作子才或未之見。

雨村詩話載遜齋詩云獨上高原望蒼茫古樹秋白雲荒
大漠紫氣滿中州水落魚龍冷山空鶴鶻遊何人吹玉笛
清韻出江樓余觀趙公登太山御帳坪云絕壁臨大壑飛
流千尺下松濤與水濤喧寂不相假石色漾月影寒鷗滌
炎夏坐从風雨來松花任飄洒崢嶸蕭瑟與鄧詩之沉雄
風骨略等五古滔滔百韻尤爲傑出子才見之不知云何
雨村又云趙所選程墨原本正嘉嘗見其爲秀才時臨場
擬作點爾何如一節共十篇五花八門奇正相生真文陣
之雄古文亦卓然作家乃詩既不與遜齋共播於門生之
口閩撫劉次白先生選山左時文鈔古文鈔俱未之見有

幸有不幸可慨也夫公泰安人由縣令起家大拜亦漢人所僅見者

王西躔夢庚浙江金華人拔貢生松潘同知喜爲詩在蜀三十餘年隨地觸境無不有作暇日無可抒寫輒問題於朋好所著有烏程紀草灌江滌筆魚通蠻唱蜀都鴻爪玉津寄興東關續遊諸詩於邊疆風土尤悉詩集散布最多咏蠻中轉經樓云浮圖湧七級兜率基三重何如法輪王旋轉隨輕風人骨笛羊皮鼓嗚嗚逢逢亂跳舞天風吹動千萬聲輪轉空中不知數法輪常轉佛日輝祥雲低擁甘露霏佛法不停經不住層樓梵筴高巖巍輪迴六道苦汨

沒風金水火遞逼迫舉手轉輪輪若飛好逐重輪上金闕
轉經樓活佛窟跳鍋裝云青稞釀甘蘆酒熟細竿吸滿春
盈腹跳丸舞劔那足稱鍋設中庭競馳逐豹尾冠牛革屨
雙脚高騰如築杵珊瑚瑤毘毘裳歌喉聒耳音繞梁跳酣
舞倦載進酒舉頭向甕抱兩手猪臄牛炙堆滿盤主人歡
呼張笑口縈塵集羽誰所傳禽歌獸舞交相沿吹幽擊鼓
百日澤犬羊食息真堪憐跳鍋裝開瓊筵皮船渡云飛流
激石罅欲渡河無梁舟楫不可施目眙徒望洋蓮葉輕瓜
皮薄木蘭松檜勞削鬪鴟夷浮渾脫束折葦渡杯苦局促
護羌校尉製作奇縫人改革皆舟師嘉良夷俗遞仿倣庖

丁奏刀篙楫施鞏用黃牛革滅盡鍼綫迹臃腫大有容枋
然瓠五石團圓止受兩三人直檣橫纜百不陳循流駛疾
登彼岸穿石屈曲達通津皮船渡利行人其過海子望雲
山詩均足紀風土不具錄

楊未禪迦憚直隸新城人拔貢生茂州刺史善書嗜酒工
詩好蓄法書名畫置園成都池亭竹樹頗稱雅構以乏貲
轉售致仕後僑居頤園栽花種竹昕夕談讌一日無客不
樂在京琉璃廠得紙堅厚縱橫有紋紙兩重旁無縫形似
桶以爲側理紙題咏成集年已高而跌宕風流如香山社
中人也與王西躔交好題其集云手挽銀河漑八荒此才

斗石正難量賞心不厭千回讀繞指真成百鍊鋼太史文章遊益壯杜陵風骨老逾蒼玉壺一片冰心似那許纖塵擾筆芒蘭契同心紀昔遊卅年官轍徧梁州名場困我誰青眼年少如今也白頭勝事獨能追李杜同袍何處覓曹劉等身著作從吾好得此應輕萬戶侯

陳雲帆廷璧貴州人四川布經歷少貧十五歲以筆墨謀衣食爲某大府識拔招致幕中手書奏稿百十卷來川應常制軍之聘書法秀挺爲人所重有墨搨十餘種能詩與沈少雲張庚拜一時名幕交善豪飲好客年得數千金不能供其揮霍署牛華溪鹽大使時周篁村訪之作長古一

首書扇以贈並畫白牡丹題一絕云十二欄干取次開仙
風嫋嫋下瑤臺姚黃魏紫休矜艷富貴原從冷淡來

魯學浩字養庭浙江會稽人游幕在川素好爲詩才氣豪
邁功力亦深夜過綠口云綠口江如練扁舟夜始過露寒
漁火暗風急水聲多世事空山曉人心瀚海波湘中無限
景振觸柰愁何夜起口占云輾轉不成寐披衣獨啓扉風
狂星欲墜雲湧月如飛鍊馬聲偏急銀缸影漸微無聊還
就枕魂夢竟難歸舟夜云酒醉人不寐輾轉聽雞鳴月落
山無色江空夜有聲孤舟千里客殘夢五更情欲擬張衡
賦羈愁觸處生過洞庭云秋漲滿重湖蒼茫接太虛地平

山盡楚天遠水吞吳破浪千帆駛凌空一雁孤岳陽何處

是曉日辨麝蕪

按虛字在六魚古韻通七虞

宋由溪灝廣東花縣舉人爲新津令四川本朝少鼎甲大
竹江國霖戊戌中探花由溪爲房考所取士也道光二十
年庚子由溪丁艱余奉委來署始相識有七律云新陰小
屋薄江城晨起猶嫌袂絮輕牆角一連十日雨稻花剛得
午時晴綠槐樹靜秋先到白紙窗虛眼正明軍旅倥偬欣
奏凱暫時休息愜幽情

自註乙未閏六月我邊凱撤驛路塵清雨餘無事靜坐小廳甚自適

也題鄴江館有句云拍岸驚濤歸戶牖繞牆平樹劃村廛

晨星夜月思千里香粳黃花住九年亦可喜

胡茜春世怡與兄支山遊幕於蜀原籍浙江山陰喜爲詩
有贈宋謙之詩云秋風颯沓商聲起鷹隼高騫疾如駛雲
橫棧道君何來月射蓮鋒我知矣丈夫廿歲不成名欲將
生計憑飛履輪蹄碾盡關山鐵四方雖遙志在耳昨宵快
讀劒俠傳彼何人斯輕萬里去若飄鴻來若矢健快擗豪
蹤跡詭熱腸時復一轟動千山雪片消爲水紅燭三行酒
百杯腰閒霜刃騰空指英雄舉動略如斯眼中之人惟有
子滾地驂騑銀鏟脫刺天鸞鶴文毛綺一鞭斜挽芙蓉城
肝膽便向吳兒是吁嗟乎宋子男兒會當越秦關歷燕邸
陟崑崙跨桂海酌長春之葡萄駕追風之騾駟盼齊州兮

九點烟建殊勛兮千秋史誰能跼蹐作轅下駒誰能結聚
如穴中蟻誰能與俗夫爭短長誰能向廚媪計鹽米誰能
日競錐刀同估客誰能久治詩書號博士此意告之世人
多不信信此者惟我與爾彼天將若何壯心騰突無時已
翳夫坐空谷而守寒門者不禁鎖唇咋舌緘喉而裂背高
歌一曲心狂喜持以贈君君莫鄙同逐春城柳葉騎暫傳
友誼桃花紙他日相逢咸陽市剪燭西窗話靡靡歷落嶽
竒一氣奔放如天馬行空不受羈勒

四川幅幘遼濶氣候不齊風俗亦異初在省垣多陰少晴
多雨少雪歷久詢問風土則不盡然省城歲除或桃花盛

開茂州則六月下雪乃什邡近屬成都登大蓬山者亦六月雨雪宋梅生正月往雷波過峻嶺積雪盈尺至雷波則桃李爛熳如二三月時畫爲長卷陳竺山咏之云愛他絕域春如錦雪窖天開十萬家楊荔裳咏高日山云岡巒起還伏時節春徂夏絕壑聲琮琤冬冰未全化却從深雪底時見花朵亞瑩白胷殷紅被徑足嬌姸如此奇景他處所無若夫風俗在內地者衣冠文物儕於鄒魯魚鹽秬稻比於江南而西南一帶蠻獠雜處支板爲屋壘石爲礪食鼠食蛇衣毛衣皮椎髻跣足烏言獸奔跳鍋爲飲酒之禮吹蘆爲婚姻之媒燒骨以卜刻木爲信以強梁爲頭目以殺

戮爲耕作白骨黑骨生夷熟夷莫不震懼天威疆以戎索
視昔之長牙食人短尾穴地者大有殊矣而接壤之番部
雪山青海喇嘛統攝範金作瓦罩鐵爲簾三男共婦十戶
養僧則又付之化外者爾

黃帝封其子於若水卽今冕寧地有七十二池金池出雲
黃色黑池出魚黑色紅池水紅有紅龍焉具體龍形長僅
寸餘可玩之掌中有攜歸者行未數里風起雷震龍突騰
空蜿蜒數丈還歸池中矣

西南夷人生男對客詐云女亟取竈下煤塗兒膝下三日
不變方信爲男否則勢綻出黃膿竟成女矣後可以生子

真可異也

李日新字學愚江西金谿諸生來蜀視兄代理賈事居市
廛日事吟咏清溪一葉放輕舟清溪漾淺流竹灣漁子市
烟樹酒家樓前浦日將夕短帆風正秋機心吾人息來往
不驚鷗花塢春風撲面香攜酒來花塢席地笑開尊幕天
晴向午人閒有漢秦世外無今古一醉伴花眠問花誰是
主和希古閣自二仙菴晚歸原韻

希古閣友人周蘭圃夫
人所居室也蘭圃同遊

先有落日紅侵水底天竹梢微帶晚來煙小橋流水剛聞

笛老柳枯荷乍咽蟬入暮涼風秋有信裊空香篆火初然
闌干並倚人雙玉羽化何須說二仙附原唱板橋涼爽晚

晴天颯颯西風亂暮煙一帶濃陰遮宿鳥半溪殘日苦吟
蟬鐘聲度處人閒甚詩思清時月皎然未獲御風天上去
藍輿飛走可如仙

尹內山名敬元富順監生性孝友尚氣節年十三以家貧
廢學經營貨殖二十年家累萬金酷嗜書尤殫心岐黃青
烏之術道光癸卯秋遊峩肩得疾歸語家人曰吾功行圓
滿矣旋歿自作睡得道人傳李春坊五子惺爲題詩栢樹
行春夏甫交初禾苗遍野布偶行過城南有叟賣栢樹霜
皮尙含煙根節猶帶露一幹不盈把作計何謬誤老叟前
致辭含悲答以故上年苦官司拖累城中住日費約百錢

百錢難理訴典我冬夏衣鬻我耕鋤具盡飽貪役囊求免
猾吏怒豈無負郭田田荒空餘賦猶幸今春和菽麥佐朝
暮菽麥又已罄祇此木未蠹遑顧葉青青聊賣蘇涸紉一
株一日餐十株十日哺尙恐鬻兒女那禁淚如雨喜蔡綿
冑表弟至話舊人生會合良非偶咫尺雲天難聚首况是
姻婭倍關情十年一見隔何久地曠情聯誼不踈相逢那
禁開笑口睽違面目幾回看昔日童顏今老醜坐談身世
幾歎歎屢看浮雲變蒼狗感慨悲來涕淚零新橘天奪我
良友謂呂止菴綿冑表弟
昔曾從學今沒二載不堪重憶舊交遊載將風月頻
呼酒吳下阿蒙非昔時吐屬煙雲驅筆走才思敏悟辨焦

桐異書到眼都能剖嘆我年來學力衰苦把精神欲抖擻
枯腸搜索不成章晨起劇談日至酉感君意氣讀君詩呼
童夜剪春畦韭相期十日醉醅酊明朝莫賦玉關柳

周篁村立椿南川拔貢生掌教隆化書院與觀葦杭明府
唱和最多同胡我山夜話云夜深風雨助清談早歲光陰
尙熟諳十載功名分半芋三春情緒繫雙柑分明往事成
蕉夢閱歷多時覺蔗甘笑指尊前須愛惜綠燈秋影鬢
移成都解纜舟中卽景云槽搖欣對菊花天詩興都教景
物牽兩岫人烟蘆影隔一篇秋水浪花圓漁人靜向灘頭
立估客僂從舵尾眠絕勝江南新畫稿疎林淺渚矮蓬船

太安驛遇馬堯階副將帶兵自新疆凱旋云萬里烽烟靜
三軍甲帳收馬嘶雲棧雨兵洗劍門秋贈子刀猶在慚子
筆未投匆匆又分手聽唱太平謠

周仁恬篁村子生時祖母夢人贈梅一枝小字梅生諸生
亦能詩和陳漢槎孝廉秋草云短長堤畔小橋邊遠望迷
離十里烟絲雨香風迷舊迹金樽蠟屐憶前緣蘆花白映
霜初下楓葉紅堆火欲然猶愛雙飛蝴蝶影淡黃撩亂夕
陽天秋來騷忽向誰論極目平原日欲昏紫塞黃雲天地
色荒臺破塚古今魂空如蓬鬢添新恨無復裙腰認舊痕
太息居山爲小草風中勁節答天恩甲辰鄉試留別同姓

兄弟云莫墮英雄淚升沉聽自然功名期異日爾我尙中
年折柳頻增感看花會有緣同舟仙侶伴不上孝廉船屈
指蓉城路槐花兩度秋囊金看又盡席帽笑仍畱愛客高
懸榻憐予不繫舟良辰須努力分手莫夷猶辜負高堂望
尤慚對弟兄登樓遊子感倒屣主人迎夜雨連床夢秋風
旅店情同根原葛藟珍重舊家聲未得乘風去羈畱嘆此
身依依青眼客戀戀白頭人行止殊難定文章自有真團
圓親愛意話別語頻頻

張寅卿輦飛廣東進士攝榮篆前任趙及菴解組後代籌
其歸資時復詩酒唱和鏡香亭賞荷波心端合置輕橈花

氣撩人欲語嬌別有閒愁消未得夜來涼雨滴芭蕉家住
隆溪溪水邊沿溪夏日長青蓮六千里外重回首一片鄉
心幾度牽

王椽山名德淳榮邑人性敏好學下筆落落數千言立就
好詩兼豪於酒年未四十以孝廉終山居卽事云松樹響
如濤柳花團作絮滿目綠參差鳥啼不知處誰驚土龍飛
濛濛雨不止陡爾破窗來添我硯池水松風四面吹竹徑
一條引時攜椒眼籃入林採石菌機忘鳥不飛地僻花逾
好覓句繫何人推敲似賈島

丁瑞臣名光獻榮邑明經新霽過大石門云初霽路猶滑

行行過石門濤聲松際吼雲影岫閒屯地僻人烟渺山空
鳥語喧此中高臥好不復問桃源

張容字心如號青崖樂縣康熙舉人任安徽青陽令解組
後貧不能歸里士民日饋薪米見其衣敝請爲製新衣固
辭旋各出一錢作大布衣一具以獻並歛金以資其歸著
有青陽宦蹟草五言金陵歸舟卽事云風來江浪白日出
海潮紅梁山大風云急雨翻青樹癡雲湧碧空七言懷歸
云造物有情容我懶征塗無事笑人忙感懷云敢望俗情
無白眼應知時命有蒼天別建德令西園弟云善事上官
非屈節恩畱下里豈邀名皆可誦

程韻蘭字莖卿江南上元人前任樂山衷雅堂之曾孫澤卿之室也隨澤卿流寓四川有課花小室詩草暮秋云江郭深秋後銀河照晚晴棠紅嬌欲語柳老碧無情新月同肩瘦殘烟比鬢輕鄉愁消未得小坐又寒生芍藥花一縷香絲繫晚春歛紅醉露倍精神宮衣半脫圍金帶信是花王近侍身秋夜感懷無端小謫落紅塵每恨裙釵誤此身惟有菊花同我淡可憐秋色可憐人癸卯夏赴鑪城出黎州塞虎嘯山風起雲沙撲鬢飛重巒懸曲徑落葉襯斜暉路遠庚郵曼村荒亥市稀迎涼贏得早五月試秋衣

徐十樵文賁雙流拔貢爲階州通判罷官無家可歸掌教

景賢書院十餘年脩脯惟供購書買酒詼諧自樂脫口成
詩著有十樵詩話卒後門人劉芳皋收存未知付雕否山
行云一山相送一山迎緩緩籃輿賦遠征亂石堆中尋路
去驚飛野鳥不知名題畫云結廬恰好近江邊古木蕭疎
帶晚煙指點飛鴉天外去順流獨自放歸船

蕭蘭亭常芬溫江諸生隨任河南歸其兄芷塘常菁官粵
又復遊粵南北足跡幾遍性慷慨貧交多得周濟以此家
貧幕遊連年卒於成都有嶺南草湘江草登迎暉樓云往
古魚鳧國登樓欲放歌壯懷空宇宙勝氣挽江河事作千
秋想時憂一瞬過男兒須稱願何意老吟哦有懷堯東郎

卽用見寄原韻云袖愛煙雲足愛山刀環初唱又陽關鴻
書盼自天邊至蝶夢疑從月下還南浦一年秋草色征袍
幾點酒痕斑相逢記否螢飛候半側銀缸夜話閑

綿州李芳谷德揚家有園亭水竹之勝客至投轄唱酬不
倦詩集四冊有句云深秋落葉聲疑雨夜靜流泉響似琴
以秋海棠詩徵和寄詩者麕至趙清寅云哀艷漸銷瑤瑟
夢孤芳空鎖玉階烟僧明宣云珠淚三生銷舊恨檀心一
點挹清香女史丁采芝云盈盈好媚斜陽影點點應愁夜
兩天有孫鳳筠者用漁洋秋柳原韻四首和之不具錄
岳大將軍容齋原籍甘肅後官四川因家焉家人夢忠武

入室而生本王後裔復爲後身軀貌甚偉勇力絕人所用
銅錘重六十斤而儒雅自命與王當日相類湘江漁人得
王玉印于江震澤人王徵君硯農嘗以書畫展轉易之印
高徑寸廣九分古光黝然鐫王姓名篆法瘦勁爲友借去
歷二十餘年復歸拓本寄蜀與諸詩人觀玩多有題咏惜
容齋未得見范白舫詩云萬馬一蹴羣虜僵直驅河北兵
威張忽降金字牌十二千古寃莫如岳王惟王少志身報
國豈爲斗印動顏色掃除劇盜視等閒誓圖恢復靖疆域
二十三札神寶封金甲玉帶酬勳庸高宗初未忘國耻哀
詞尙泣攀髯龍誰遺權臣秉鈞局閣中小紙付幽獄三字

驚違天下心兩河猶望元戎纛中興四將推岳韓空餘詞

翰垂不刊一存一亡功孰計英雄似夢夢應寒自古英雄多似夢韓

蘄王南鄉子詞王昔手書出師表曾觀墨妙筆奇矯丹徒句見梁谿漫志

山太守藏有王手書諸葛武侯前後出師表長卷墨跡余曾於漢口敬觀燁燁精采餘丈強怡

園包山客漢藏弄祕家寶徵君好古卓不羣快得王印湘

水瀆玉質螭鈕高徑寸黝然赭點雲霞文久假不歸逾廿

載默禱神祠訴真宰一朝客到舟艤門趙璧歸趙無恙在

拓本流傳萬里來顯晦離合何奇哉印以王佩重山嶽仰

見讀書儒將才史稱王好左氏春秋孫吳兵法春秋義先正國本建儲一

疏盡丹悃文臣不言武臣言當時譏訕又奚損書生扣馬

和議成倔強老子騎箕行痛飲黃龍付虛語十年功廢贖
長城乞斬三頭力征討否則願死東海島金人募書懸千
金深宮甘作朝廷小嗚呼此印既不得隨王生入燕雲閒
又不獲隨王死殉湖上山惟有汨羅一躍潔身去至今碧
血猶復凝斑斑河伯呵護馮夷守光芒夜夜射斗牛潛蛟
蟄龍不敢吞天意持送詩人手神物沉淵七百年笑閱滄
桑遞變遷古篆紫泥耀日月何殊敬讀金陀編安得遠取
怡園卷與君印並陳深院定有精忠靈爽憑英風颯颯聞
酣戰

白舫名錯烏
程人遊蜀

中江何盛斯題蘭亭圖云新者無不陳來者無不逝人生

蜉蝣耳所貴絕拘滯我欽會稽客了無浮塵繫芳春天氣
清忻忻事修禊曠懷古今閒勝境一流憩筆墨紛古香詩
酒結深契大塊助性靈鶯花供睥睨上下數千載風流復
誰繼至今披圖觀如遊永和世鹽亭姚紹中云永和墨妙
古今無硬黃一卷多模糊二百年來誰賺出少長四十二
人寫成圖寫圖貴寫古人致觀圖貴觀古圖意倏然二十
八行三百二十有四字劃眼飛鴻海中戲今人不能使古
人來見我不可不使我與古人同向圖中坐同古人坐與
古人徒自此年年三月之三日同向會稽之山陰攜酒壺
二詩一涵雅一縱橫各有其妙

楊翰未禪刺史子道光乙巳進士工書喜爲詩嘗錄舊作
見示月下有懷云夜氣浸閒園林塢涵虛靜月上碧雲高
人共梅花冷松陰如水流滿地橫藻荇石碣煙蒼蒼空塔
立鶴影永懷素心人寒風動金井又一詩記其半云孤臺
百尺俯龍湫雪水摩空蕩素秋深翠蘼烟垂柳密亂紅翻
葉晚楓稠忘其爲何題矣

吳迪齋錫康從章初香來榮詠署中西園諸景云秋水淨
無波沙鷗來復去何人間妙香坐在花深處

鏡香亭

灼灼枝

上花畫工描不就平明倚窗前妙影紅霞透

紅笑山館

聽雨難

成夢樓頭客思縈竟將愁萬縷卷入此秋聲樓

聽雨樓

薇花繞

室香清風拂不散搖來零亂影時時堆几案

薇香書屋

劉丹崖熙載雙流歲貢生喜爲詩移家云生涯飄泊逐西
東少達詩人豈諱窮已去年華徒潦倒未來事業尙朦朧
甲科枉費三春夢丁字何如兩石弓日辦身家勞瑣屑最
憐賃廡是梁鴻

仁壽有人掘地得一隧道深四五里旁列石人馬雕刻如
生盡處並排五門石版掩閉方雇石工鑿門地保已報官
時胡竹塘光瓚爲令來驗卽時填土封禁道光八年事也
按仁壽有蜀定王墓又有一塚不知何王俗稱皇墳不知
所掘在何處

周文恭公焯涪州人兩次奉命來川人以爲畫錦之榮
公勲業德望重朝野不必以文名而詩自可誦彩鸞何事
不雙棲幾度春風冷翠鏡太息才人偏命薄忍看遺稿舊
標題老親無恙慰泉臺介壽高堂晉酒杯婦也而今供子
職肯教風木有餘哀提攜猶子惜伶仃每向天閣乞假齡
啓笥但令絲手澤雞窗常伴一燈青牀第呻吟淚未乾可
憐弱骨已摧殘貞編傳出紅梨館附與閨媛仔細看右咏
龍貞女蓋賢而有才者得此表揚足以不朽

民以耕織爲重各縣亦多種綿榮邑有綿每欲咏之而未
果潼川張太守松孫有咏吉貝云廣州木棉大如樹吳地

草棉名亦著或呼吉貝或班枝物性無殊同是絮哀牢白
慶貴南朝巴西蜀北滿平皋四月乘時好栽植勤鋤滋長
多棉桃東舍西鄰相助作魚羹麥飯飽歡樂禦寒無具盼
豐收更重春耕與秋穫青囊曬破苞吐絲懸鈴團簇花盈
枝白雲片片鋪原隰風溫挾纈相參差攜拾攜筐走空室
稀膏滑軸純棉出亂瓊飛灑一弦張白玉搓成萬條雪絡
車伊啞冷孤繁又聽籬邊促織聲手足皸痲不知倦機上
停梭疋布成入市換錢輸薄賦再成裁剪爲襦袴連年梓
穉慶盈寧男多餘粟女餘布咏織機云如房之繭纈絲長
越羅蜀錦稱精良自得支機供組織兩川處處勤蠶桑五

月新絲初入市百室絡緯終宵忙
倒景飛晶弄機杆長裘
交禕成玄黃不作浮華薄靡綺
但以疎密相誇張
鵝溪凱
江製近古小姑嫠婦工無荒
縑繒絹縠盡利用通乎貴賤
宜溫涼寒雞喔喔聲軋軋得尺
望咫尺時度量流蘇縮綜勞
伏起踏躡相次揚徵商解軸辭
機夫壻喜沾須待價權收
藏一絲一縷出辛苦世多紉袴
輕膏梁錦綾素紉未知暖
弗服弗御猶盈箱寒士鷄衣不
蔽體偶得做褐矜華裳

車西號雙嵐溫江副榜少時才氣
縱橫既困場屋就河南
州判權某縣事大府稱其能方行
保薦遽卒郟縣劉莆田
州牧收其遺墨得詩二千餘首古文
二百餘首付梓錫山

鄒鳴鶴序其古文以爲馳騁極似大蘇而史論十餘首破
空立議筆力蘄蘄奇氣勃發尤爲絕作別墅詩云到來別
墅覺心安不與於陵一例看愛養魚苗池水滿怕傷鶴羽
竹籠寬逢晴乞菊和泥種趁月移琴按譜彈如許清閒誰
領略微風初汎過幽蘭獨坐云出山猶是在山初花落庭
階自掃除落得閒官消俗累好將暇日讀奇書有人乞畫
旋磨墨無客談天且種蔬泉石市朝都莫問漆園濠上一
觀魚漢殿仙弔李麗華序云麗華蜀宮人幼慧有以吳江
月令屬對者應聲對曰漢殿仙人因以漢殿仙呼之獻賊
破蜀囚密室絕粒五日不死吞金卒時年二十歲芙蓉城

破萬花死珊珊環珮留仙子葳蕤深鎖六宮春不許落
隨逝水妾身已作長門閉滿眼河山空雪鴻首學鶯燕
李花隨風到處間縈繫吳江月冷蜀山摧漢殿秋殘長絲
苔承露金盤何處去仙人原自住蓬萊拚死不食人間食
恨不當前手殺賊君王義重身命輕一點黃金冷入臆
噫嘻乎漢殿仙子蜀宮人可憐留得千秋身御溝怨弔齊飛
鸞序云賊破城蜀王周貴妃同縊端和殿飛鸞投御溝死
深宮不見春尙有御溝流御溝溝水流紅葉宮女感之啼
紅頰飛鸞本是蜀宮女生小盈盈習歌舞千翻弄影學霓
裳一曲迴眸催羯鼓君恩如水水難量誰知身世閱滄桑

一掬清波萬行泪，生生死死逐君王。君不見華清池，薛濤
井水雖清污妾影。芙蓉秋冷香魂遊，年年杜宇啼御溝。御
溝今日水流絕，飛鸞之事不可滅。荷花引弔嚴蘭珍，序云
蘭珍華陽人工書，年十六與同邑齊飛鸞許若瓊、李麗華
同選入宮。甲申十一月賊攻城急，珍投荷池死。荷花開白
苧歌殘，笑舉杯。荷花謝采蓮舟，穩銷長夏。君愛菡萏顏色
美，妾比芙蓉初出水。十三學書臨池工，十六選侍深宮裏。
新妝水底妒朝霞，入世真成解語花。不比蓮心徒自苦，年
年護惜君王家。豈知一旦秋風惡，眼看花開復花落。柔魂
應逐水仙王，霧鬢煙鬟何處着。太液池邊生白波，藕絲忽

斷柰伊何蘭芳已共荷香歇莫唱汪南子夜歌

大足劉節婦巴縣陳氏女大廷尉劉乙齋先生名天成之
子婦婚未一年其夫以縣尉出官山東節婦往省夫已病
篤禱天割肱和藥以進不效誓以身殉數千里外隻身扶
襯歸幾次投繯爲人所救翁遣庶姑勸以立嗣爲夫後且
云翁雖喪子有媳奉養視媳猶子也節婦勉從之燕京士
大夫咸以詩文紀其事李藥房先生天英詩云劉家節婦
陳家女十九于歸姑已死姑死可柰何相我夫子心靡他
甫八月良人去一官輕別離九點齊州樹三年不見病擾
身阿翁不知促婦行婦來夫病劇藥裹愁人心愁人心淚

沾臆袖刀出門夜昏黑博山爐染鮮血刳妾肉醫郎病妾
身托郎以爲命此心此肉天爲證嗚呼妾何辜天不憐其
愚使妾偷生使郎歿妾何敢活以頭觸棺棺欲裂誓死相
從命幾絕翁知之遣阿姨阿姨婉轉費言辭夫從姑死姑
有兒翁今無兒翁何依以女作郎姪作子姑耶耶耶心應
喜嗚呼婦苦矣婦何傷若松柏之始生厯拱把而參天若
竹箭之有筠厯霜雪而堅貞巴字水清且漣懷清臺相後
先他年共見青史編事在乾隆丙申及己亥其夫縣尉翁
廷尉

馬寶夫若虛本李姓其先西域人籍浙江兄弟數人半由

幕入宦途軍功留川補用者三寶夫分發別省未就居成
都起怡園布置樓亭得自然之趣與其弟綿州刺史述軒
名紹祖者同居甚篤友愛時以小詩唱酬刻有詩集數卷
爲人書聚頭扇款云呂致和以三月三日邀集草堂爲九
如先生作生日余病未往杜老吟蹤寄幽棲傍錦城一樽
重碧酒三日麗人行籠竹煙仍合團沙水自清朋來肴醑
薦分席引瑤觥會洛多耆舊風雪慕古賢桃花上巳水蘭
襖永和年遺躅懷詩史清樽作壽筵花明浣溪路不負暮
春天老我添衰病花時獨掩關卅年游息慣跬步往來艱
雅意追陪地風流想像間良辰易懷古吟事尙蕭閒

新學沆忠州刺史章紳之孫甘肅大通令宣之子安徽舒
城人年十五學詩文不及三月古文詞賦無不工雅清明
云東風漸老杏花天雨後晴嵐媚一川蠟屐踏殘青草色
紙錢飛撲綠楊煙小簷日暖巢新燕古木春深喚杜鵑
憶昔年遊賞處秦雲蜀水兩茫然題王遲士預園事志小
照云石上蒼苔雨後痕繁花細草鎖離根孔庭詩禮饒閒
思偶坐濃陰一課孫近水茅亭長綠莎棋欄戰處引藤蘿
含貽既罷嘗新茗助得清香有碧荷十頃漣漪一逕芳
波小鴨亂迴塘呼兒池畔當風立領略蒲花幾度香林塘
景物自清幽弱柳絲絲罩碧流數到芙蓉消歇後桂華香

折一枝秋同題此圖者爲胡虎文光裕驚其下筆之捷以爲孺子不凡虎文詩云承歡到此倍殷勤玉筍蘭芽各不羣回首家山千萬里教人自恨弗如君錦鳳花含曉露芳竹闌柳隴午陰涼攜兒閑向迴塘立風度荷花滿袖香虎文亦安徽人以諸生遊幕至蜀工漢隸善鐵筆

彭海樹毓珍丹稜人樂齋觀察之孫父宰蒼梧使歸娶婦時年十六值鄉試以監生入闈前後兩薦不售改應童子試縣試居榜首院試孟子題長上下文記憶不清被斥明年復居榜首乃得入泮尋卒夜雨會飲以疎雨滴梧桐分韻得滴字云舉杯邀月破岑寂黑雲四合煙如冪打窗一

葉傳秋聲秋聲雨聲不分析門前幾樹好梧桐亂瀉青光
上階鬢君不見芭蕉之雨太淒涼海棠之雨淚欲滴何如
此夜疎疎雨三點兩點聽淅淅憑闌共喜來清風滿座都
將炎熱滌同人賦詩我不工豪飲鯨吞頗無敵狂來起舞
歌狂歌但恐匣中龍劍乘風一吼竟穿壁

觀葦杭風雅多情赴黔之役攜小鬟梅喜冬筠同行作詩
贈云肩輿一對小憨癡臨水登山到處隨况爾風塵三月
共嗟余離苦兩心知何曾教曲旁觀樂也侍更衣午夜披
唯有買花錢不惜朝朝濃艷壓鬢歎又寄孫姬陳姬云莫
鎖眉尖忽別離萱親近日可安怡霜絲一握兒千里冷煖

悲歡要爾知

陳淑芳富順劉曙窗光代之造室也冬日微雪和東坡原
韻同曙窗作縫裳初試手纖纖綺閣寒生夜倍嚴玉笋未
傾金谷酒珠盤先進水晶鹽不知白戰花飛院疑是黃昏
月挂檐斜倚西窗看未足霏霏瓊屑上眉尖侵晨慵起鬢
堆鴉嬾踏瓊瑤馭繡車道蘊庭前唼柳絮壽陽額上點梅
花冰肌合入無雙譜縞袂相逢總一家最苦孤舟篔簹叟
寒江獨自弄魚叉

葉小珩恩培龍游人楚珩子從父遊蜀父歸里小珩畱川
中數年矣工畫美人寄內云一自分鴛侶長懷志未舒鄉

心愁蝶夢封淚寄魚書雨冷催刀尺風颺乏絮柳高堂全
賴汝客舍乃孤余欲冀盤餐壁徒遺土載車雖憐寒女怨
怎得遂歸廬其室勞氏葆粧答云束髮期君解何時理鏡
妝有誰憐弱質無處訴愁腸落葉催刀尺裁衣度短長悲
哉常作客倦矣可還鄉勗學言雖美辭榮計亦良羸來青
紫貴儂已鬢如霜

廣漢女史張仲芬題鳳翥吟稿云同夢生花筆一枝蘭閨
酬唱樂齊眉青衫紅粉都雙絕新婦參軍配合宜擲地真
聞金石聲信哉五字抵長城他時續集輪嬌女雛鳳音清

愈可聽

聞女公子亦善吟咏

省垣烟戶不下數萬加以衙署官寓用煤炭最多價亦最昂居者苦之不知煤炭皆爲富金錢者收買囤積窮民運送肩挑背負其苦更不可言潘紫垣作炭夫吟以憫之成都不易居米珠而薪桂烟火千萬家石炭實兼濟此物產嘉州鬻賣無征稅峩峩大牖來一纜江干繫販夫轉售人錐刀利亦細運送藉貧民擔挑作家計賴肩血染襟胼手汗流袂數步必迴頭幾番聊小憩渴飲惟清泉飢食但粗糲白錢度朝昏數口卒年歲祇知養妻孥那暇憂身世方今時不和到處遭疫癘此輩獨安全未聞有病斃上蒼似見憐保赤偏蒙惠嗟彼富貴流值茲炎歊勢消夏做名園

納涼開別第，統扇月團圓。
葛衣風細細，雪藕更調冰。
紉蘭還佩蕙，何嘗弭災殃。
未免資藥劑，先民曾有言。
佛氏亦有偈，宴安多禍胎。
勞苦生智慧，請爲炭夫吟。
試以炭夫例，紫垣著述多。
種近寄詩一冊，美不勝舉。
錄數聯以概其餘。五言山橫嶠冢斷，路繞石門長。

陽

江山秦蜀險，風月漢唐多。

童關地連三輔，闊天接二陵。
低

函

滿身沙雨細，撲面雪風寒。

沙雁門晴積雪，龍洞夜生雲。

維

故人青眼少，新貴黑頭多。

下人烟籠小市，鳥語隔深溪。
連天沙草白，映日水雲黃。

渡

皆能追步盛唐七言，紅杏曉沾花市，雨綠楊晴鎖錦江烟。

威都劔閣雲深真似墨，巴江雨細竟如絲。

武連

遇雨十七年中行。

役苦五千里外別離多詩皆可誦也

楊對山名變成都人博覽載籍久困場屋庚申學使陳鍾
溪先生閱其詩文奇賞之爲拔貢首選辛酉登賢書終不
第挑教職君於諸子百家釋道方技無不悉究尤精篆刻
摹秦漢金石文窮神盡變著有樹茶軒存稿自雙流至新
津途中口占云溫和天氣便人行下走擔囊趁曉晴脚健
不煩輿馬代一林花送一林迎自新津至臨邛作云綠遍
江鄉紅漸稀鼻魚苦筍正鮮肥鷺鷥巢在遠山樹日向水
田多處飛漫天歡喜蓋山愁華屋同歸貉一邱春不世情
恣點綴野花亂簇古墳頭北關外早行云最好人家近水

莊藤花籬豆簇茅房種蓮祇爲收秋藕贏得陂塘夜氣香
碧樹涼烟清欲秋露蟬初飽噪聲柔葛衣欲溼迎風健行
到花間賣酒樓文君當壚處云春風吹客臨邛去閒遊來
訪賣酒處美人黃土已千載漢朝佳話資談助識人俊眼
知琴心同歸更無取酒金鷄鶴買醉四壁立中夜難溫合
歡表郎才素有凌雲志所少財耳妾能致故惱玉孫重攜
來妾自當壚郎滌器當壚可羞妾不羞嫁得才人香名留
程家鄭家富敵國閨中夫婿慚紅樓阿爺意轉分家僮千
指送歸田宅豐丈夫那用奩中物題橋人去乘長風負弩
來迎高車回富貴安可忽乎哉白頭吟比長門賦保恩都

緣文字媒封禪遺書遣誰寫當年犢鼻亦風雅誄詞哀如
柳下妻可憐未亡人再寡

桐城姚石甫名瑩由乙丑甲榜以知縣用初游粵省繼仕
閩中屢著勞績洊升至臺灣道今官蓬州刺史家集甚夥
竝著有東溟文集後湘詩集客有談塞上事者見說飛狐
塞遺城尙漢秦黃沙忽陷馬白日不逢人小吏琵琶飲元
戎虎豹陳古來征戰地今作一家春蘆溝橋晚眺云萬馬
蘆溝道馳驅竟日過書生謀國少將帥受恩多白雪迷春
戍黃沙合凍河無言帝都遠北極照滹沱京口萬里氓江
下金焦阻海門氣吞三楚盡雲變六朝昏伐荻悲龍子撐

蒲念帝孫猶能輕百萬儋石不須論烏程道中云向晚烏
程道孤舟送北風林深兩岸黑日落半川紅冷覺潮初上
昏疑路不通何人吹玉笛嘹唳入雲中出瀆陽峽云竟日
樹疑雨不知天已秋亂雲埋大壑絕壁下孤舟響雜千林
鳥泉通一湖流言從瀆陽峽直向海山樓古木蕭蕭動九
秋平原渺渺集離憂河邊落日荒涼下天外飛雲浩蕩浮
粵嶺書違千里雁秦淮人繫二年舟不堪身世艱難甚極
目還登百尺樓九日云九日尋秋秋正哀水清煙冷夕陽
開卽看冒雨黃花好不分無書白雁來故國山多聊避節
異鄉人滯幾銜盃暮天千里西風急何處飛雲是粵臺合

泚懷古合泚城外莽雲消千里長淮地勢遙
廟衣冠瞻孝肅兒童刀袴說張遼春來戰壘烽煙靖日落平原獵火
燒回首江東何處是行人北去馬蕭蕭登徐州城樓憑臨
楚漢千年地惆悵風塵九日杯秋草已無人戲馬暮鴻猶
送我登臺南迴山勢雲龍起北望河流汴泗來詞客不關
興廢事黃樓獨憶謫仙才春日登粵王臺粵王臺畔送斜
暉山色青青草色肥千里夢中蝴蝶散一春花下鷓鴣飛
英雄祇合蠻夷長詞客重來褐布衣杳杳南天金鼓震幾
人銅柱立勳歸滔滔莽莽具有萬夫之稟當今誰是出羣
雄應爲屈一指也臺灣行七古足志風土生平嘗怪方士

言蓬壺方丈

瀛海

閒謂是大言誑人主世豈真有三神山幾

年作臺灣東過滄海窮烟瀾扶桑枝紅挂朝日珊瑚樹綠
充庭滿澎湖時時出琪樹高者盈尺聲璆然四時花蕊開
未歇夏梅春桂冬桃蓮長年暄暖無霜雪老死不著棉裘
種山中之人木末處下者亦在蒼崖巔食無煙火況炊爨
男女赤足垂雙環頌律不到周夏正豈有隸首窮某年洪
濛以來到唐宋不與中國人通船漢初尙未開閩粵此乃
荒島盤雲烟或者昔人偶泛海飄風一至疑神仙愚民自
誤誤世主妄思人可壽萬千豈知世果有此境但無藥草
能朱顏若令武皇在今世不待晚歲憬然翻我爲此歌傳

世俗沉迷聊破千年關集中五古功深七律懷古者三擬

慨懣落美不勝收

作臺灣疑有脫落或七律首題爲登樓是幾年作吏在臺灣

周慰邨澤濃成都優貢工書好題咏離堆遙望遠景天然

入畫圖半含秋色總模糊城開谷口雙扉小路束山腰一

綫孤風送鳥聲輕欲碎雨餘人影淡如無奇觀不減江南

勝何事扁舟泛五湖褒斜道中帽影鞭絲落日斜停驂遠

眺興彌賒山含雨氣雲堆黑壑噴泉聲水作花石壁暗中

多古字樹梢深裏有人家烟巒不是無情物頓使温公手

欲叉醉歌行我欲軒冕登廟廊冥冥之中有主張我欲遺

世作仙佛苦縛塵網難離物惟有眼前盃酒得自專醉鄉

任我作張顛張顛一飲輒一斗以頭濡墨便揮手人呼草
聖不回頭謂我得名原在酒有酒誰不飲酒中無我非妙
品飲酒誰不醉醉中有我仍是累不如卽酒卽我併入茫
茫中神遊八極空天空不知我拙古人工不知人達我尙
窮但覺乾坤一氣運鴻蒙眼前奔走皆飛蓬灌夫舌劉伶
口此外風情復何有君不見從古健兒豔封侯歸老林泉
盡白頭

陳蓮舫瀚涪陵人壬午孝廉司鐸郫縣聞李貞女賢卹其
家且引之謁節孝祠以堅其志爲作四六啓以徵詩自作
古體一首序事詳盡蓋能維持風化者也詩有序云李貞

女許字崇寧，刺應儒道光庚子應儒年二十一貞女年十七已定昏期七月七日應儒以病卒其父欲再爲相攸女赴水投繯矢死靡他應儒母亦孀居遂議送女歸其家誼吉奔喪拜孀姑盡哀邑士夫盛傳其事予爲歌以紀之共工觸山八柱靡天傾西北誰補此天且不足何况人人間恨事難罄紙君不見岷山之陽李氏女李氏女蒯家婦蒯兮三歲喪厥父女兮三歲喪厥母有父無母邀誰憐有母無父苦安訴門祚衰薄日難度各隨母族相依附男角女笄漸長成從媒已訂金石盟冠笄年已近納吉期已行銀河烏鵲飛冥冥天上忽失牽牛星哀哉此貞女含情不得

語同牢廟見儀未舉意欲往從之六親多見阻潔身赴清
流澆我萬古愁投繯志更決自拚此生休阿父見之悲女
跪前致詞長跪嗚咽語願爲蒯家兒父曰嗟言汝姑送汝
家頭戴素髮身著麻一痛幾絕聲呀呀一時見者聞者泪
交加世間闕陷誰能補此女流傳直萬古未嫁還是亡人
妻養姑代夫心獨苦獨臥孤榻凜寒冰人窮呼天天不應
惟有鍊心如鍊石彌補缺陷此女能登盤龍石山望錦城
懷古云立馬千峯頂西川一望收夔門封鎖鑰劍閣扼咽
喉城郭偏安地江山割據秋英雄曾幾輩往事憶炎劉
綿州孝婦陳氏戶部小京官師諤女前貴州糧儲道孫西

堂文煥之子婦也婦幼失怙隨母依舅宋觀察文型長爲
國學生秉敬室秉敬自黃岡返道卒一子僅三歲祖翁年
八十矣值壽期家人祕凶問婦隱忍含笑以奉祖翁望孫
切病沈篤醫無效婦潛割臂肉和藥以進家人不知也翁
歿西堂微聞作詩以志舅氏子西橋學博名琦作排律四
十餘韻紀事甚詳結處云遶膝衣重舞搖風燭尙光惟思
遽子杳不道少年亡望眼頻朝暮離懷莫抵當遂教嬰疾
病漸覺入膏盲鬱久知難解恩深報未遑人間空藥餌天
上任祈禳慘淡形先瘁精誠痛竝忘但希沈革起寧戒髮
膚傷夜色微侵戶寒鐙靜映牆鋒銛徐拂拭血肉縱淋浪

神有經旬格旌宜百代坊無文聊紀實握管意蒼涼章秋
濤廉訪凱時爲州牧爲作樂府起云古來孝婦悉難數但
孝翁姑未及祖誰與救祖意獨苦君不見孫家婦陳家女
結云人爲詩作奇語我爲詩告千古莫祇孝翁姑翁姑尙
有父蓋刲股療父母翁姑者多割臂療祖翁僅見孫孝婦
爾子名鼎勳孫名恕癸卯秋闈恕卷落余房力薦未售其
人都雅能承家學

陸海峯世潮父任巴縣令卒海峯年尙稚無親屬幕友家
人星散獨老僕陳姓不去攜入省斥賣衣物及餘金共得
千餘兩乃放與人生息衣食外歲有餘積延師督課前訂

婚在本籍僕與回家迎娶復來蜀爲海峯捐職海峯少年
跳盪偶越禮僕苦諫否則對之流涕出而妄爲則哭而隨
之海峯爲之止若慈母若嚴師海峯得鄧井關縣丞沃缺
也捐陞知府現署蕪湖道子七一員外一知縣一州牧一
典史海峯每謂人曰余之官與妻妾子女皆賴陳某之力
不待言卽余之稍能判斷提筆作書亦其督勸力也在富
順爲僕娶妻妾冀報其後人而僕終無子海峯每祀先必
供陳於神主旁嗚乎陳某古之人哉今世得此人可以風
天下惜傳者忘其名

四川川北鎮總兵朱公射斗子名澍給二等輕車都尉世

職以主事於道光六年放甘肅涼州道升湖北按察河南
布政漕運總督丁母楊氏憂二十六年服滿貴州巡撫入
奏忠臣有後爲國重臣可喜也朱公貴筑人

龔晴皋有融巴縣孝廉也善畫潑墨淋漓生氣遠出字極
奇肆而性孤僻不諧俗重慶李太守壽日紳士將製屏以
祝李公曰以素紙倩龔先生書畫足矣晴皋是時設館於
城聞之先期避於鄉閱月乃返則壽期已過太守景慕綦
切親拜其門辭不見已而瞰亡答拜太守無如何後官直
隸縣令越二年得買山之資急告歸自作生壙置石臥嶺
上橫書大字曰龔晴皋之墓

吾東趙及菴時爲樂令延金堂陳上雲家樓司筆墨上雲
卯生之子也工篆隸畫山水蒼鬱雄奇詩亦能世其家爲
人題梅花帳額云縱橫疎落總精神寫到羅浮幻亦真流
水不分今昔夢半牀明月認前身一覺醒來聽鳥音遽然
如夢費沉吟滿身花影渾無辨認取平生鐵石心歛書道
光四年夏日題於三榮之薇香書屋屋與聽雨樓連中隔
竹壁同題者趙芸圃名敏孫清宵萬籟靜無音一枕幽香
夢裏尋明月不嫌人寂寞移來疎影暗相臨上雲年四十
餘卒芸圃則未詳其人

雲南解銅官胡君至敘州永寧以事畱滯月餘善畫螭爲

沈珏齋畫三幅題詩云不見雙鰲已廿年每當提筆便流
涎何時重返江南地明月蘆花繫釣船字亦甚佳

雙流劉芷堂孝廉沅落第歸經紫柏山遇道人與談良久
若有所悟自是不應試云幸此生不負讀書居成都教授
生徒從學百餘人脩脯聽其致送無多寡額數貧者無饋
聽之或贈以膏火之費多掇科第以去與諸生會講有期
餘時獨居不相接故從學終歲不必盡識其人資稟既高
用功三十年著有十三經恆解刻以行世探源理窟實有
心得視沉溺俗學講章者不第分上下牀也作道德經註
大洞經註或戲呼爲通天教主蜀中眞箇心學問人時下

應首屈一指性通脫非迂腐道學一派兼通天文地理醫卜星術其疏解四書參用他說或出己意不盡遵程朱是讀書求心不苟爲雷同

劉愚船敗麓數十檢故紙及破書散亂不全者付丙丁奴子攜一冊雜投火中取視乃其高祖遺稿細搜他麓得其先世文共十六冊皆其曾祖建中公七十餘歲手錄者裝潢完整偶與王遲士諸人請凡凡工詩文愚船默念當祈作序他人未知也凡忽書願爲運箕如飛頃刻成文雅有理致起云南豐劉氏世族也其後宦遊益州遂家焉劉子雲船風雅英偉好古書愛文字不求譽于人亦足爲劉氏

光矣一日取先世手澤編而存之孝子之心也予感其誠而序之以下序文不具錄歟云司馬子長固非雄深雅健之作而筆無停機要亦才鬼

嘉州鱒鯉魚重十餘斤三二十斤不等至巫山大至千餘斤漁人以巨繩懸釣置餌船上作軸似轆轤纏繩其上不計尋丈魚吞鉤縱其所往既久徐徐繳繩魚覺疼忽又縱去如是再四魚力已疲繳至船側以鐵叉刺其首若非長繩寬縱力猛船覆不可救矣釣是魚者必來縣求印以墨印紙謂達龍王非是不可得魚咏之云巨餌投江百丈深長繩旋轉運機心憑他岐淚灑山力笑看銜鉤七縱擒割

肉紛紛市上忙頭臚如許價偏昂

魚頭骨
脆美

龍王不稅漁鱉

利只索空文印一張

五屯故金川地也所產南瓜圍三尺重一二百斤每一枚
必用四人扛之大僚巡邊或帶歸以誇示人

諸城劉燕亭先生

壽

太傅文正公會孫也博洽好古著有

金石苑搜羅甚富在川復輯三巴善古志前任陝西榆林
道嘗遊慈恩寺於雁塔下得泥造像或全或缺大小八枚
其全者曰大唐善業泥壓得真如妙色身三行十二字陽
文背面一佛坐蓮臺左右二侍者立蔭以兩娑羅樹下二
獸作對伏狀其殘者文同而造像各殊或作三層上層列

佛三軀又左右二佛皆坐蓮臺中層佛三軀下層已缺佛
前各執一蓮花又一上層缺中一佛坐左右二佛持蓮花
寶蓋下層亦缺先生自作跋甚詳作詩誌之云天竺眞如
境長安古帝鄉城南尋勝概山北間斜陽浩劫迷金刹紅
塵失寶坊江流空有曲塔影遠相望何處蹲師子當年瘞
雁王旛回吹拂拂鈴動韻鏘鏘中對三門矗高凌萬仞強
欲參無上諦獨躡最初枕蔓沒題名蹟雲深選佛場有人
談晉武無漏溯隋煬道入流中國時還憶大唐慈恩祈太
后聖教述文皇危磴標千尺豐碑屹兩旁至今遺石墨自
昔重圭璋我更探神祕遊須遍法堂留心勤洗剔搔首正

傍徨拾得驚仍怖傳觀喜欲狂淤泥修善業淨土印香光
譯義皆元奘評書合遂良化身方寸壓妙色箇中藏豈假
丹青飾奚勞燦爛裝雙林寒桂窟一瓣落蓮房樹亦除煩
惱花應現吉祥棄原同瓦礫寶或數琳瑯大小分完缺畸
零較短長雕鐫周二面文字只三行歲月無從計圖經不
可詳然證親供養琢句費商量頓覺雲生殿頻看月轉廊
歸來忘酷暑心地自清涼

郭小房太守

夢熊

濰縣人守順慶道光己巳年升甘肅蘭州

道作七律四首畱別士民刻石甘露寺一時僚友多和之
者皆步韻詩中癡字錢字最難押和詩有云愛才如命竟

成癡兩袖清風不用錢甚工

辛鳳遷名綠雲德清蔡蕤僊之侍姬也母夢青衣女跨彩鳳止其庭越夕生女有文在手曰鳳因以爲名幼聰慧四歲能誦七言詩長而端麗工書善鍼術蕤遷遊幕在渝見而愛之媒定攜歸成都評花賞月賭茗彈琴四壁蕭然怡如也姬曉音律工鐵筆能作韻語蕤遷繪萼綠仙侶圖以志永好方周歲而鳳僊以產難卒矣時蕤遷就館威遠纔兩月得信急歸遺鉤剩粉悲不自禁姬善事女君述其臨終語曰寄語蔡郎三生石上合續舊緣伏牀向東叩首泣下吟詩而歿詩云現在君生卽妾生曾經對月證分明後

身還與今身約尋到孤山度綠英

吾淄高氏多能詩續刻山左詩鈔入選者十七人今歲高
伯鵬遠程開關來蜀檢其行囊途中得詩多可誦歎其家
風未墜也泰安道中云別家三百里行近泰安城日薄山
無色風寒木有聲岱雲連雪白汶水接天清回首般陽路
茫茫烟霧橫又有句云馬嘶驛路丹楓老船泊江灘白雁
秋風起河干沙沒脛雪飛天外凍沾鬚音節響亮意態沉
雄吾淄詩人殊不多得

李作梅號藝堂大竹諸生少年喜詩築麗春園邀朋輩觴
詠其間性好遊所至有詩哀然成集滿酒士也咏秦良玉

遺硯云上馬殺流賊下馬草露布桓桓秦夫人丹心照毫
素夫人容貌本傾城文武才略無不精遺畱一片端溪石
始識胸中富甲兵侯封卽墨何堪惜石兮曾佐勤王績非
寶其物寶其人顰脂臺畔傳羽檄邵續女崔寧妾古來閨
閣多英雄誰似夫人嫺翰墨淋漓餘瀋映朱顏疑漬當年
戰場血今持此硯染霜毫也思投筆學六韜君不見美人
遺物皆千古尙有團花舊錦袍與江曉帆太史善太史寄
贈館課楹帖口占云萬里京華雁落遲故人書到晚秋時
哀然一幅蘭亭序附以三年玉署詩太史近爲香案吏請
生共仰大宗師空山照耀生花筆蓮炬分來自鳳池

張曉村守庸山東長山人己卯舉人大挑知縣分發四川
因無子買妾甫一歲卒余以詩弔之云也似羅浮夢一場
參橫月落剩淒涼人閒好景皆多事局外何心亦斷腸攜
病入門疎粉戴畱鐙消夜泣蛩螢去年秋月團圓照正喜
明星小吐芒未幾曉村署秀山去世袁小泉啓洸與曉村
相去三十里幼同學又同年攝篆雅安余專使函致小泉
賻五十金輓以詩云筆研硯耨憶當年一別鄉關路幾千
萍跡又從蜀地合相逢攜手各欣然文場附驥偶成名自
折丹花歲屢更本欲南宮膺上選誰知命薄是書生常把
無兒嘆鄧攸千金買笑費持籌豈真香案無仙吏何事催

君赴玉樓問天不語待如何瞻望空悲蕊露歌遙祝舟從
巫峽下中流安穩少風波

新建凝翠樓邑孝廉張海雲

軒

詩云到此無塵境悠然

遠眸天纔開境界人烟變風流路曲因刪竹牆低好起樓
放衙佳客到夜坐數更籌知稼亭原小蠅廬不在寬安排
營斗室妥帖對岑巒暑到荷先賞秋深菊任餐雅宜詩酒
會撫景共盤桓訟簡名餘暇衙齋日月長窗排雲外岫座
挹鏡中香新雨蕉抽碧微霜柳染黃山林在城市花月好
平章聽雨樓中住曾經聽雨聲倚欄常看水對月屢飛觥
往事都陳迹重來倍有情只慙詩律拙髭斷句難磨

楊誠村芳在川勳名甚著張兩山懷溥聞其河北殺賊事
咏之有云河北健兒夜吹角銅馬蒼鵝奮地出守土周苛
已被烹嘯眾孫恩誰敢逐飛將軍從天上來十盪十決妖
氛開暗鳴叱咤山嶽摧指揮號令如風雷雷聲破地堅城
裂萬卒衝煙刀滾雪螳螂奮臂當車轍欲退不退短刀接
揮戈一呼電光掣人在陣雲出復沒左甄右甄頭顱積是
人是馬模糊血元戎一月三告捷萬口萬目楊無敵

竹王相傳剖竹而生人以爲疑不知後世亦有似此者未
可以爲誕也唐開成嘉州有柳生癭剖之得小兒或育之
長成以柳爲姓後爲僧居漢州道行甚高勅建聖壽院人

謂之本尊寺明時有龍出井中漢州張懷泗遊之有詩云
客路清晨尋跛僧霧淞落地煙花凝老佛垂眉獅子睡幽
曲之堂吾已登本尊宗派何所承柳星孕育光千層一朝
解脫得妙悟羣魔咒盡心無矜舊聞塔旁龍出井泉脈至
今深以澄由來神物不在此非同魴鯉人能嘗當其抱珠
守元氣髮髯枯禪通上乘忽然雷雨際時會爪甲燦爛雲
飛騰四十年前叩關處達官泐石名猶稱塵沙歷遍都陳
迹空餘老態悲鬢鬢前琉璃淨如拭試問西來奪幾證
衲子無言山鬼笑小鳥喧啾疑代鷹寒山拾得癡流淚他
時饒舌知誰曾去去勿復耽茶肆前村有酒壚陸莊